


謝幼槃文集



謝幼槃文集

謝邁撰

叢書集成初編

(補印本)

謝幼槃文集

一九三九年十二月初版
一九六〇年五月補印

謝

遽

撰

商務印書館出版

上海大東集成聯合印刷廠印刷

序

臨川謝無逸諱逸其文章學業爲搢紳推重以其所居溪堂稱之曰溪堂先生弟邁幼槃以字行兄弟以詩鳴江西有文集合三十卷邦之學士欲刊之以貽永久積數十年而未能也粵紹興辛未趙公朝議來守是邦期年政成民服其教慨然思以儒雅飾吏事命勒其書於學宮以稱邦人之美意昌言以鉛槧董茲職於是搜訪闕遺以相參訂晚得溪堂善本於前學正易歲又得幼槃善本於其子敏行歲知溪堂出處甚詳敏行逮事其父詩律有典刑其編次是正可無恨矣刀筆方興士大夫翕然稱贊工未訖功而四方願致其集者日至以是知二公之名重當時欲見其書者惟恐後也聞之鄉老無逸之交游無非天下名士其後幼槃聲聞寢廣與之並驅而爭先既歿之後爲之傳序爲之哀詞祭文者甚衆今未暇博詢而徧錄也特取舍人呂公之所書摹其真蹟於後庶幾因呂公文而不失二公文行之實云壬申冬十一月辛卯朔建康苗昌言題

右	從	事	郎	軍	事	推	官	宋	砥						
右	文	林	郎	軍	事	判	官	陸	園						
左	迪	功	郎	差	覈	州	教	授	苗	昌	言				
右	中	散	大	夫	通	判	軍	州	主	管	學	事	嚴	仲	遠

謝幼榮文集序

二

右朝議大夫知撫州軍州主管學事兼管內勸農營田使趙士鵬

宋淳熙二年十二月陽夏趙

圖重修

謝幼槃文集目錄

第一卷古詩

賦陳虛中振芳堂

三益齋

十八學士寫真圖

汲同樂泉烹茶

王坦夫靜寄齋

哭董彥孚

復用槃字韻示內

寄題雲臥庵

次彥速示輪老韻

翠雲道中觀穫

中秋示座客

第二卷古詩

雙蓮閣

顏魯公祠堂

觀文忠公墨蹟

讀呂居仁詩

示何之忱

次槃字韻

送董彥速遊仙巖

初夏園中觀草木

食藕

喜劉世基至

雨後秋山

種松

同董彥光陳妙音遊安樂寺分韻用尊前鳥歌花舞得尊字舞字

聞彥光田舍遇火

許巨源送筍

灌園

題醉道士圖

題文與可墨竹

寄孫子稷

登同樂亭飲泉

吳民載棄意堂

次董彥光乞米韻

分韻招無逸兄得益字

翠雲分韻得禪字

次劉世基韻

王摩詰四時山水圖

同陳虛中觀水漲

送朱尉

晏如堂

題呂隆禮詩後

次洪駒父遊明水韻

咏二疏

集庵摩勒園分韻得時字

第三卷古詩

次韻李成德筆几

復次前韻奉和

次韻郝子中所藏筆几

賦李成德墨牛

次韻成德謝人惠墨牛

和李成德藁字韻

感白髮

次董彥孚韵

有懷覺範上人

喜汪叔野見過

寄題朱氏小隱園

高麗墨詩

貫時軒

第四卷古詩

陶淵明寫真圖

約諸人遊羅坊觀

題石鼎聯句圖

讀三都賦

喜雨

午日

碧筒

秋日登鳴玉亭

次韻董之南讀彥光詩

次韻董彥光睡起病目

追和柳子厚二詩

次韻董之南見贈

竹友軒

讀莊子內篇

斲荅軒

戲問無逸病目

讀葛洪傳

田父招飲不赴

賦木犀花

寄題王立之賦歸堂

亦愛軒

求定齋

寄饒次守

讀潘邠老廬山紀行詩

汲古齋

寄李商老

第五卷律詩

觀陽關圖

招李成德

次韻彥速送珍上座

採金櫻子

讀何易于傳

讀嚴子陵祠堂記

觀魚二首

悼潘邠老無逸兄二首

隱居

秋日登擬峴臺二首

秋暑

寄汪伯更二首

喜彥速自仙巖歸

莫莫堂新竹

夏夜對月

煎嬰粟湯二首

問劉世基疾

蔡師直畫山水研屏二首

觀碁

喜晴

和季智伯病中書事四首

送香與董彥速二首

晚春書事二首

螢火

朱濠州挽詞二首

題于逢辰畫

端午卽事

題陳陽木石二首

杞菊

倦夜

懷祥首座

第六卷律詩

寄李商老

青精飯三首

示李商老兄弟

春寒

暮春久雨

和陳虛中唱酬口號

七夕

哭無逸兄三首

戲咏榴花晚開一首

書真牧堂賦後

哭汪伯更二首

絡緯

喜董之南歸

晝臥二首

送酒與晏如居士二首

夏日遊南湖

咏金來禽

次李商老韻

投贈通守陳虛中

鳴鳩

種竹

懷鍾陵舊遊

食蟹四首

送王坦夫入京

聞無逸兄下第歸

久旱喜雨

有懷如璧道人二首

贈別董彥速四首

次汪伯更寄無逸兄韻

立夏日四首

招李商老兄弟

書懷

招汪叔野

晚晴步塘上

聞呂居仁病

次韻李智伯送茶三首

湯泉

槐子送之南二首

遊安樂寺

傷李簿侍兒二首

植菊

寄王立之三首

次韻無逸兄見寄

送酥魚醬菜與何之忱三首

寄劉世基

次劉世基韻

用前韻和彥速

夏日書事

寄李商老

寄呂居仁

第七卷律詩

玉茗花二首

漫成

飲酒示座客

和季智伯不見舊題二首

悼亡

呈無逸

示弟

寄桃鄰居士

寄無逸

伯時陽關圖二首

秋興

聽曹道士彈琴

寒食出郊

寄洪鴻父

懷潘子真

食菜

暮春二首

黃梅花二首

梅花四首

送都仲獻

寄題高善時醉月堂

與江君佐五福寺觀竹

吳彩鸞寫真

鼠鬚筆

山閒四首

移松二首

次韻吳民載告別覓酒二首

偶書二首

題華山高臥圖

和董彥光立春日二首

復次韻一首

次何之忱韻

從陳妙音覓酒二首

次韻董彥孚獨臥逸堂

送黃柑與彥孚二首

過金山下作

獨登有美堂

雨中漫成四首

送王山人

第八卷雜著

懷故園賦

竹夫人賦

過隋論

孝辯

送邵尉序

狄守祠堂記

適正堂記

第九卷雜著

讀仁宗政要

書元稹遺事

書賈誼傳後

溪堂先生畫像贊

竹友軒銘

陳無惑安室銘

尺銘

第十卷墓誌祭文

董彥孚墓誌銘

朱夫人墓志銘

祭無逸兄文

潘邠老哀祠

書鄭當時傳後

雙柏頌

何之忱抱甕園銘

某局銘

吳伯僉墓志銘

朱夫人墓志銘

祭董彥孚文

謝幼槃文集卷第一

宋 謝 邁 撰

古詩

賦陳虛中振芳堂

青腰按節臨天關。幻成圭璧驚人寰。一朝忽起枯槁想。墮作人間冰雪顏。國香端擬避清絕。鳳車安得窺幽閑。雪中長疑肌起粟。挽住直恐乘風還。風流別乘似何遜。哦詩興健排江山。華堂燒燈呼客醉。況引玉頰依瑯闌。廣平題賦工婉媚。杜陵索句愁飛翻。小人徑欲悟香寂。何當步繞橫斜間。

雙蓮閣

水芝凝露披芳塘。淺穠穠畫爭煌煌。其間豔異不世出。遶芳並蒂知何祥。有如一座兩殊色。盈盈植立漢昭陽。九回沈水不須沐。風梳露洗皆生香。公如瑤林映紅粉。粲然一笑傾澄觴。故開華閣挂銀榜。大篇金薤垂琳琅。吾聞草木正瑞世。簞蒲扇暑芝生房。須煩丹青顧陸手。貌取絕豔歸明光。

三益齋

元龍湖海豪。蓋代聲藉藉。只今觀耳孫。才皆萬夫敵。叔兮美無度。伯也古遺直。當年種玉翁。什襲裏雙璧。

期公垂天雲。佐郡試戢翼。尙開柴桑徑。引領望三益。嘗聞築燕臺。千里走樂劇。市骨捐千金。廐乘盡虎跡。公乃真好事。屣履見逢掖。定知子輿輩。一笑皆莫逆。

顏魯公祠堂

上皇御宇無長策。牧羊奴子孤恩澤。銀菟分印屬兒曹。二十餘州齊陷賊。常山死守平原拒。公家兄弟聲名赫。平原白首列班行。忠義凜凜真嚴霜。歷事四朝唯一節。當年舌舐中丞血。豈知丞相面如藍。貌雖夷易心嶢巖。老臣何罪死虎口。到今誰爲祛其銜。臨風志士長悲咤。矧瞻遺像嚴祠下。未能立草迎送祠。一奠椒漿淚盈把。

十八學士寫真圖

虬髯少年龍鳳姿。手提一劍平九維。瀛洲學士十八輩。如雕虎嘯清風隨。到今丰姿傳粉繪。皎如琪木參瓊枝。秦王功高蓋天下。脫略世故容小疵。數公不語意有在。欽宗流輩曾何知。倘收王魏文學館。事如辰嬴當早諫。美哉貞觀猶有憾。洗蘇衆像一長歎。

靜寄齋觀文忠公墨蹟

董何呼我顛倒裳。杖藜階西過王郎。郎君好事初舉觴。平頭奴子昇兩囊。開視文書浩搶攘。其間糠粃煩播颺。忽驚墨妙筵有光。問誰所書曰歐陽。而我盥手方取將。覽之三過神色揚。反嗟從來見未嘗。字體適媚筆意剛。公爲文章軋子長。立朝義氣凜秋霜。借如春蚓縈行行。亦當珍之什襲藏。况公字畫乃如此。銀

鉤金繩粲繭紙。公嘗臨池墨池水。尙言如船逆風使。後來誰評新麗體。出公一頭子。蘇子。

與諸友汲同樂泉烹黃蘗新芽

尋山擬三迨。放箸欣一飽。汲泉泣銅餅。落磴碎鷹爪。長爲山中遊。頗爲世路拗。矧此好古胸。茗椀得搜攪。風生覺冷冷。祛滯亦稍稍。夜深可無睡。澄潭數參昂。

讀呂居仁詩

吾宗宣城守。詩壓顏鮑輩。其閒警拔句。江練與霞綺。居仁相家子。斂退若寒士。學道期日損。哦詩亦能事。自言得活法。尙恐宣城未。今晨開草堂。書帙亂無次。探囊得君詩。疾讀過三四。淺詩如蜜甜。中邊本無二。好詩初無奇。把玩久彌麗。有如庵摩勒。苦盡得甘味。□侯南州傑。論文極根抵。讀君詩卷終。曰此有□地。期君高無上。二謝以平視。要當掣鯨魚。豈但看翡翠。

王坦夫靜寄齋

狙猴在深山。騰踔不少停。大龜藏神屋。縮首都無營。冥觀靜躁異。洞見萬物情。吾聞子王子。總角遊帝城。歸來鬢猶綠。閉關慕淵明。曲肱北窗下。風聲肅泠泠。夢覺忽驚起。猶疑車轂鳴。齋居屏萬慮。乃以靜寄名。是中得其趣。君門可長扃。倘知定能應。子冠猶可纓。鏡以靜故明。水以靜故平。茲言置座右。可配崔瑗銘。示何之忱。

往年君別去。上馬愁凜冽。今年見君面。揮汗驚執熱。吾曹雪點鬢。忽忽值晚節。云何會心侶。乃作如許別。

昨朝聞扣門。梳髮不暇結。開門問無恙。欲語聲屢咽。君家嬌小女。可念真玉雪。朝嬉繞君傍。忽作幻泡滅。念我溪堂老。誰能續此絕。嗟哉溪澗毛。瑣細不容擷。相逢顏未開。苦語心已折。吾人要解事。視世一蟻垤。共將煩惱緣。一付廣長舌。君歸數過我。不厭酒屢設。人生浪自苦。豈不愧前哲。

哭董彥孚

川流日夜去。逝者乃如此。平時所知人。強半今爲鬼。頃者哭子兄。淚積垢未洗。寧知少日間。俄又哭董子。憶昨招君談。時維六月朏。君方以病告。一臥不復起。啓手無別言。慟哭長已矣。初君在童丱。警敏無與比。讀書五行下。大父嘗竊喜。謂當寄門戶。竟以韋布死。死生事亦大。誰能獨免耳。願沾甘露味。倘悟無生理。

歲將除因誦前賢粲字韻詩慨然有感次其韻請彥光同賦蓋予與彥光皆年三十九矣

春糧適百里。九十居其半。駸駸入老境。競起末路歎。在世無他能。聊以滑稽玩。所嗟金石交。契濶或星散。詩憶西堂語。酒藉南鄰伴。共爲終年醉。莫歌何時旦。文書謾遮眼。插架復盈案。四愁不堪擬。九歌僅能亂。發春只數日。故態期類盟。寧知性本慵。矧復肉亦緩。人猶樂新故。事止仍舊貫。酸寒益生窮。斂退韓子慙。惜哉連城珍。不變三日炭。玉人可求見。何暇定舍館。退藏亟聞道。飲水知冷暖。更當崇明德。不愧三英粲。

復用前韻示內

嘗聞藁砧詞。破鏡喻月半。爲期望夫還。顧影興婦歎。乃知同室處。一笑日可玩。所悲孩抱中。聚沫何易散。嘹然唯一雛。單栖苦無伴。撫枕中夜吁。不寐常達旦。藜羹具一杯。日舉天隨案。還勝在板屋。祇使心曲亂。

小鬟雖槁項。聊可奉櫛盟。每觀績麻手。捷急真不緩。娉婷或階禍。今古同一貫。頗知食薇清。凜凜可立慄。乃甘作詩窮。烏銀以喻炭。行看春日暄。婦事勤繭館。所求亦不奢。勿遣兒號暖。布衾幸無恙。不換角枕粲。

送董彥速遊仙巖

吾聞天竺峰。聳若在天上。峰前溪萬仞。激石吼寒浪。堂中老比丘。碧眼照林莽。徜徉君屢遊。局趣我思往。此行何所求。豈欲除二障。聞呼試回頭。未可踏折杖。茅簷燕寂地。山氣日夜爽。不斬凌霄藤。君歸藤自長。

寄題雲臥庵

閒居不事事。枕簟信所便。臥形先臥心。心靜形晏然。複壁非不完。加以甃石堅。其如方寸亂。一夕嘗屢遷。榮寵萃一門。寧免百慮煎。雖有水晶屏。何由得安眠。章華踏謠娘。連臂在榻前。何如山中人。編茅臥山巔。白雲宿簷間。對鏡心自捐。我亦遺垢氛。曲肱寄林泉。茲庵倘壽我。一睡要經年。

初夏觀園中草木

翠葉蕃夏初。清陰勝花時。閉關軌長掃。步屨園屢窺。青青溪中蒲。移植井之湄。下有九節根。服食可不迷。往時手種桃。只今與簷齊。枝間有美實。少日將成蹊。採菊香滿簷。擷薺甘如飴。籜龍露新綠。椅梧長孫枝。觀身要若蕉。衛足當如葵。節憐孤筠直。惡戒蔓艸滋。天津白玉郎。看花驚洛師。吾人守環堵。草木相娛嬉。逍遙各自適。慎勿相唐嗤。

次董彥速示輪老韻三首

法涌僧中鸞。孤絕翔千仞。似聞三竺老。續此燈無盡。君遊千峰上。邂逅一笑哂。當知絕諸惡。如草已芟蘊。

二

君如千里駒。但欲見鞭影。旣明才越都。未暮已燕境。適楚或北轅。空歎道里永。是中皆坦途。幽處試深省。

三

黃花散若金。翠竹森如束。此還有妙義。機發同箭速。可憐鈍根士。每嗟力不足。須知日月疾。僅得羊腴熟。

食藕

人憐淤泥上。出此萬朵蓮。須知淤泥中。有藕大如椽。本清擬冰雪。末豔方嬋娟。玲瓏衆竅通。蚶蜆數節連。甘寒固不數。卻暑最所便。髻奴來城市。負籠口我前。開絨尙帶泥。未嚼先垂涎。霍霍磨霜刀。溜溜挹澗泉。切玉墮冷冽。已覺沈疴痊。芰實鬬角紫。鷄頭剝珠圓。秋盤薦此果。頓使二物捐。念此涅不緇。餘品莫爭妍。而能豁憂思。令我心歡然。奇功更耐老。合作飛行仙。

翠雲道中觀穫

代田誰爲西漢議。耐旱幸有古城禾。揮鎌正見八月穫。拾穗遙憐一老歌。爲言使君驅五馬。北陌東阡飽耕者。汝曹力穡更當勤。慎勿惰遊孤使君。

喜劉世基至作詩留之

君家飛猿西。我寄躍馬北。躍馬望飛猿。渺若千山隔。十載一會面。一年三寄書。書中無剩語。只有問何如。

去年秋風初。君馬秣雲臥。庵名鶴立望君來。迴鞭不我過。今年薰風後。取道凌雲來。山名解鞍偈我廬。握手慰我懷。胸中所蘊藏。言下皆傾倒。挽留莫恩恩。索去還草草。堂有鶴髮母。室有蓬首妻。屋前虎豹怒。屋後鷗鷺啼。遠遊縱未歸。旅寓安得久。三年勞夢魂。一日接杯酒。君歸太早計。此樂未易辭。人事雖好乖。興盡當語離。壯時須摩厲。老矣但跛挈。荃蘭本同芳。霜雪有一節。君識飛猿句。飛猿嶺卽謝康樂詩所謂猿嶺也。我和躍馬詩。躍馬泉荊公嘗賦詩。他時兩相寄。抑亦慰相思。

中秋示座客

去年中秋時。我病起復仆。苦遭水帝子。百計推不去。牀前客問病。草草壺觴具。酬獻呼稚子。應答煩老嫗。今年幸強健。佳節欣會遇。况有座上客。蕭散如鷗鷺。尊前清興發。豈數飛蚊聚。南山又朝隨。晚雨細如霧。難追阿連玩。徒咏希逸賦。陰晴天下同。吾事亦何預。不須淵有珠。遑恤食無兔。人無百中秋。對月復幾度。幸逢方外交。姑樂酒中趣。君看清夜徂。草上已多露。

謝幼槃文集卷第二

古詩

雨後秋山

宿雲散曾陰。秀色還疊障。如將螺子綠。畫作長蛾樣。光浮竹木杪。影落檐楹上。何人妙盤礴。淡墨寫屏幘。五絃豈須撫。衆響亦清亮。我病不出遊。素壁倚藤杖。舉觴酬羣峰。歲晚一相訪。

種松

清晨課僕奴。遠含誅蒿蓬。身非郭橐駝。學作種樹翁。胡不種杞柳。但種青青松。念汝受命獨。勁氣凌三冬。明年見汝生。何年矯蒼龍。種德亦吾願。穆如松上風。安知百載後。無人思角弓。麥陰行可賴。不必荒茅中。唯當護以棘。養視如嬰童。此法豈浪傳。聞諸玉局公。

同董彥光陳妙音遊安樂寺分韻二首

著鞭蒼厓陰。下馬古寺門。老僧乞食去。獨瞻無上尊。相將二玉人。槃礴共一罇。境靜悟塵垢。林香識蘭孫。何年鉢羅老。同訪花柳村。

鳥能貫珠歌。花能折腰舞。老人如帝江。識此真律呂。擊節復長謠。急觴猶插羽。春風已趣裝。行樂更幾許。

吾人但取醉何必浪自苦。

聞彥光田舍遇火幾焚其廩

睡龍未覺山澤枯。其誰濡幕待不虞。炎官弭節飛廉怒。小屋旋徹大屋塗。鬱攸飛空百鳥噪。輝赫照樹騰。猘呼綠林灰燼一瞬耳。況乃田父蝸牛廬。天公似惜詩人癯。約束風伯爲回車。百神救廩鳥工往。不待綆缶澆焚如。尙令太瘦逢飯顆。幸未飢死同侏儒。怪奇敢追陸渾韻。弔賀不必參元書。作詩嘲誚供一笑。逢人舉似應胡盧。

許巨源送筍

君家遠屋青琅玕。驚雷裂地千兵攢。入山長鑱不汝赦。日獲玉版登君盤。有餘鼠壤幸分似。憐我羹稀筍易寬。廚人取給畫鋪膳。頓使齒頰生甘寒。韭菹薤苗豈復數。餽美似覺無□籩。嘗聞幽士愛風竹。忍噉其子吾何觀。願君養成四時葉。它時犯雪同君看。

灌園

春初韭爭妍。秋末菘更好。嗟我喜蔬食。如人嗜羊棗。何嘗厭滋味。政自樂枯槁。念彼螟蠹蟲。性命欲自保。變相驚蛭異。將□嫌蠛躁。故於園日涉。蒔此可食草。邇來秋雨餘。三畝淨如掃。畦丁猶浸灌。小甕亦自抱。問許機事忘。何如漢陰老。

題顧凱之醉道士圖

虎頭癡絕自不癡。丹青妙處手得之。石嵒戲畫幼輿子。酒狂更貌黃冠師。一人坐睡眞被酒。一人杯杓不停手。一人回面愁不酬。二人直視開口笑。上有醉墨書者誰。翰林手題獨酌詩。題詩眞識醉時味。畫圖如寫詩中意。珍藏不換一斛珠。李詩顧筆今世無。

題文與可畫竹

我昔居西園。手植竹數箇。凜然如德友。節行不敢破。朝吟玩霜枝。夜聞蕭瑟清。風吹一旦忽。不見似覺塵土汚人衣。渴來翠雲麓。日唯見山。不見竹。雖云山氣日夕佳。尙恐無竹令人俗。昨得與可畫。自掃塵壁挂門開。風動之。如枉故人駕。對山看畫信不惡。何人更覓揚州鶴。

寄孫子稷

我家大馮君。清詩跨陰何。尤工婕妤怨。不愧青草歌。後生遊其門。玉石例琢磨。是中知味少。莫辨白黑鵝。獨聞子孫子。鏘然應鸞和。君嘗喜其似。謂可同白種。劍池佳山水。清漣映嵯峨。孫子居山閒。新詩日吟哦。探囊肯投我。百篇未爲多。論文定何時。一醉金叵羅。更當期皓首。共理釣魚簑。

登同樂亭飲泉

何人愛斯泉。結搆泉上屋。空亭何所有。冷氣宜三伏。泠泠石甃淨。須眉眞可矚。欲飲無尊壘。挹彼纔盈掬。何時近亭居。更種亭畔菊。日飲潭中甘。庶用稽死錄。

吳民載棄意堂

此身聚沫無堅強。斧工伐性藥腐腸。寸田蕪穢尺宅荒。玉石落落不滿房。黃婆居中補四方。焦勞亦坐意所藏。十如饒瘠草不芳。令人槁項馘亦黃。世人紛紛各膏肓。我以妙語名斯堂。期君得意觀濠梁。從渠婪酣狠如羊。君自放意無何鄉。一洗滯疾生天光。漆園發樂君得嘗。

次董彥光乞米韻

董侯朝飢雷殷腹。咄嗟無人羞豆粥。杜陵太瘦緣作詩。玉川辛勤坐憎俗。細君截髮恐未暇。有弟能令餉君粟。不妨更就乞檳榔。他日金糲供一斛。

分韻招無逸兄得益字

長懷烏衣遊。親姓何戚戚。吾曹乃其後。何不追往迹。向來鴻雁影。曠若星辰隔。沈思不可見。佇立久悽惻。去年霜霰中。送別衢路側。今年冬風至。猶未見顏色。念我如楚囚。欲往終未得。倘能爲我來。不遠道里百。要觀衡茅下。有此座上客。新釀秋已熟。老菊寒尙坼。彌年心怫鬱。可以一笑釋。仍當戒後乘。聯翩載三益。翠雲分韻得禪字。

杖履信所適。溪流忽濺濺。行入武陵村。偶入桃花源。劃然見華屋。佛界開青蓮。忽忽伊蒲饌。一餉腹果然。同遊得吾黨。曠達真能賢。董何韻俱勝。欲拍諸阮肩。兩王亦豪舉。一擲常萬錢。周郎秀眉宇。要是佳少年。衆中兀坐予。少味亦寡言。困眠借僧榻。自嘲邊腹便。平時所懷人。磊落星辰懸。會合不易得。茲遊豈非天。重來恐寡伴。獨訪祖師禪。

次劉世基韵

兒時窺豹見一斑。晚學一技千金殫。齋房芝草不並秀。且浚秋菊綴春蘭。無心時共白雲出。忘機日對沙鷗閒。窮人與世各異調。敢望一唱仍三歎。昨來卜居向崑邑。玉川破屋纔數間。朝看爽出氣遠岫。夜聽遠舍鳴清湍。幾回欲掉酒船去。賀老不見空稽山。劉郎好事肯過我。入門矯矯真翔鸞。平生飲客愁腐死。望君復來酒今旨。君如止酒要談道。同酌寒泉淨無滓。哦詩雖復落君後。強學猶將効臞里。懸知吾廬不落莫。有客同盤飯葵藿。已呼摻手縫錦囊。更遣長鬚具芒屨。相攜踏徧翠雲峰。得助溪山應有作。

王摩詰四時山水圖

欲知摩詰詩中畫。桃紅柳綠皆摹寫。更含宿雨帶春煙。一段風光生筆下。欲觀摩詰畫中詩。小幅短短作四時。山平水遠含變態。是中有句無人知。此公盤礴萬物表。胸中炯炯秋空曉。戲磨淡墨汗絹素。世上丹青擅場少。何人乞與輞川圖。裝成小軸四時俱。壁閒仍題六字句。人言雙絕古今無。

同陳虛中洪駒父登擬峴臺

雨聲何浪浪。溪流勢洶洶。莽蒼兩溪閒。不辨馬牛風。翻疑坤軸裂。渺與天河通。林杪露寸碧。濁浪奔蛟龍。櫓搖扁舟下。袖手閒篙工。疎烟媚晚霽。飛雲帶歸鴻。境物復可寫。妙手無僧崇。登茲百尺臺。令人豁奇胸。尊開河南守。坐有西山洪。遊目託遠懷。平水念禹功。視河不治行。它日望兩公。吾儕何所樂。白首臥船蓬。送邑尉朱登仕告老歸華亭用玉局老仙寄王慶源韻

君不能黃冠還鄉乞鑑湖。又不能拏舟送米煩胡奴。白頭眞負平生志。妙手毫端敵萬夫。向來惡少虎負嵎。職當疾走編其鬚。袴鞬不是老者事。腰閒羽箭吾初無。揮杯勸影古寺底。日有野老爭攜壺。頗遭官長勸歸歟。婦能右掖兒左扶。但令妻病足鹿脯。何憂兒寒止熨襦。尊絲作羹鹽未下。鱸膾切玉秋不糲。華亭自昔託鶴唳。蕙帳後夜聞猿呼。不羨人閒冶容子。團圓十五正當鑪。

宴如堂詩并序

季智伯渠州使君大夫公之長子也。早以學問稱。其家兒不幸壯歲失明。不能世其祿。洽聞強記於書。無所不通。尤愛淵明詩。常使細君誦之。至會意處。擊節不能已。舊以女家人木蘭隨其後。木蘭旣辭去。常扶杖獨行。逍遙自適。客至必具酒。與之商論古今。飲酣興健。仰天而歌。未嘗以貧病撓其胸中也。廬山李商老。命其所居之堂曰晏如。且作銘號智伯。晏如先生可謂名稱其實矣。智伯求予詩。爲賦雜言一篇。

西都執戟郎。田少家無儲。雖云貧賤不戚戚。著書防患何多虞。柴桑避俗翁。寢迹安吾廬。如何尙作貧士詠。更賦楚詞長嗟吁。乃知兩賢蒿目憂世患。不如先生無日自晏如。朝哦詩千首。暮對酒一壺。木蘭能歌作行雨。但聞龐婆時誦園田居。閒攜筇竹自索塗。醉或起舞噴人扶。幅巾深衣端可畫。每嘆伯時何在無人圖。往日山陽徐仲車。不聞世事唯耽書。使君早與合堂坐。誇今譚古定自娛。徐能開口論事以難客。君當書空作字以曉徐。吾知二人可同傳。不知紬詩太史今誰歟。

題呂隆禮詩後

岐山鳳多雛。鳴必中律呂。乃知忠厚家。要作謙退語。申公三世後。有子筆甚武。四公如日月。映照萬萬古。此郎膽如斗。一筆要連挂。不知秦陳輩。渠欲置何許。它年品斯人。戰國一豪舉。

次洪駒父遊明水韻

邁也學耐辱。況負三宜休。頗有幼輿風。自許壑與邱。仙境想方丈。山形懷不周。如何在眼山。未暇著屐遊。翁鬱明水峰。爽氣常不收。遜公釋門老。苦節無匹儔。食訖自灌畦。挈水端若抽。到今巾屐在。迹勝境亦幽。常評左輔賢。當從古人求。從政獨何有。未說賜與由。勸耕徧阡陌。民譟殖田疇。幽尋到山寺。弭節聊滯留。衆賓各文采。粲粲五整輈。賦詩雜流麗。如柳春映溝。何必打兩槳。歌舞催莫愁。聞風我滋悅。尋勝行且謀。朝遊可暮返。豈曰山川悠。

詠二疏

辯如懸河陸大夫。不畏嫚罵談詩書。歸來分橐養羣雛。隨從歌舞樂有餘。兩疏高蹈要齊驅。長揖儲君歸里閭。願爲羽翼還商於。豈願飛刀鱸生魚。揮金延客以自娛。子孫勤力舊田廬。同時異代多不如。高明長遭鬼厭歛。平明爭入七香車。華屋擬用黃金塗。壯心雖在逼桑榆。長歌擊碎玉唾壺。宦成名立盡歸歟。江湖之上可胥疏。君不見渠家父子並轡出。東都于今粉繪寫爲圖。

集庵摩勒園會者十人以它年五君詠山王一時數爲韻得時字

生涯水中萍。漂蕩信所之。十年餬其口。不食故園葵。思歸同越鳥。長是巢南枝。祭竈郭北隅。小屋如雞栖。園開十肘地。草木方華滋。紅榴媚夕陽。初筴搖輕颺。招我賞心舊。於焉持酒卮。合離如日月。果有絃望時。詩壇失老將。一鼓氣已衰。賴我如虎賁。典型獨在茲。相歡且盡醉。莫咏驪駒詩。

謝幼槃文集卷第三

古詩

李成德作二筆几以其一見遺云得樣於郝子中家并示長句輒次其韻奉酬

琴不安絃製奇古。可憐不入文房譜。鼠鬚龍尾玉蟾蜍。與汝俱成會心侶。誰能好事爲品題。端効廣微亡輒補。謫仙傳樣桂林家。以暗投人吾竊取。我書太俗如墨豬。下慙羅趙何足數。豪公厚貺試臨池。一字不成如畫虎。欲報初無青玉案。哦詩况乏驚人語。淨鋪滑薄待君來。慎莫踟躕畏今雨。

李成德復用前韵見貽亦次韵奉和

蔡家筆法擅今古。楷書尤誇荔支譜。後來誰筆最通神。要與渠伊爲伴侶。只今書學貴瘦硬。弟子闕員誰可補。君持此几要投人。字畫不工那得取。小人俗書如俗馬。骨少肉多今不數。當君此贈恐不堪。大似無功饕鹽虎。新詩繼作苦難和。只賞君房妙言語。嗟予老矣亦懶書。留與兒曹寫時雨。

次韻郝子中所藏筆几

聞君文史三冬足。家居未奏三千牘。明窗某几淨無塵。筆硯清幽真不俗。小琴承臂筆縱橫。章草真行隨所欲。家藏敵帚將何用。時人尙作千金畜。此雖奇物君不惜。似把隋珠當魚目。小童傳觀許見貽。與君杯

酒初相屬。吾詩戲作異香山。唐衢雖見何由哭。見公真玩爲君賦。銅鉢聲終字盈幅。

朱端甫以畫牛一紙遺李成德成德以示予爲賦長韵

畫牛蹏角四十八。褚生塵昏僅可閱。頭頭露地各逍遙。不愁牽車喘見月。舐筆和墨誰氏子。定是道人非畫史。把鼻牽回得真牧。信手摹成妙如此。朱公自是老斲輪。不惜是牛持贈君。願君成誦石鞮語。更將此畫同參取。

次韻李成德謝人惠墨牛

君不見八百里誇王氏駁。常敕家童瑩蹏角。綺襦紈袴競奢豪。臥席不安愁禍作。何如傳寶墨牛圖。不飾青黃如素樸。向來奇畫購千金。宜在蘭臺天祿閣。兩牛方圖未雌雄。或奔而從或小却。其餘三四亦殊絕。或如虎臥鶴俛啄。滕王蛺蝶東丹馬。嘉陵山水青田鶴。如將優劣比人材。長文何必慙文若。人言愛畫亦一癖。被野牛羊何用貌。是家持論果非耶。煩君試爲評其略。

午日

今晨定何祥。桃柳各映戶。粉團高氣薰。鵝鴈椒葉覆。朝飧隨士風。杯酒晚來具。綵絲纏祭筒。畫楫誇競渡。楚人哀怨情。正以屈子故。常年葬魚腹。蓋坐入宮妬。榮華一時好。放逐千載慕。得失吾不知。持杯自欣豫。成德不面逾月。僕以病暑未能出謁。輒和所寄藁字韻詩奉寄。兼柬子中。

門前蓬壚無人掃。客去牆陰藜莧老。我家城北君城南。相憶何其挂懷抱。不聞叔寶方外談。澄也何因令

絕倒知君不作避暑飲。閉門亦深荒徑艸。鉤章棘句日吟哦。玉軸牙籤時探討。邇來聞草鹿脯帖。盛湘十日虛蘋藻。摻摻丸藥恐不免。俗客縱譏何足道。恨我猶嫌襤襪嘲。不敢熱行唯夢到。君收奇功翰墨林。筆陣可掃龍駒島。願言不學司馬公。萬事逢人盡稱好。我詩燕石初不如。浪欲珍爲夜光寶。殘暑促裝行造請。曉來涼氣迎秋早。定邀鄰舍廣文公。同聽誦詩傾腹稿。

碧筒

君不見韓潮州。銀作飲醪誇工倕。鵝花鏤葉太鎖碎。何言豪士亦爾爲。又不見六一翁。嘗吟鸚鵡紅螺詩。華堂一醕豈不樂。清歌勸酒須蛾眉。吾儕山人寧有此。競折圓荷爲飲器。細傾初作露珠圓。滿引忽驚雲夜碎。鼻中寂寂聞妙香。舌本徐徐識真味。採蓮當殺花當妓。豈有登臨百金費。安得城西十頃塘。水光容裔暑風涼。時引碧筒如象鼻。仍看翠蓋立霓裳。

感白髮

吾年昔始冠。已有一髮白。作賦數百言。嘲罵等戲劇。只今尋舊作。一字不復憶。恍然如夢寐。了不見往迹。但有髻間絲。冉冉如堪織。南方地卑濕。壯歲多老色。行年四十二。髮鬢那容惜。洗蘇將拔白。諱老嗟何益。一染復星星。此語記阿客。人生光景促。倏忽如敲石。詩成亦寢語。感歎初無得。後應不識今。今已不識昔。

秋日登鳴玉亭

山路秋陽何赫赫。山亭淒涼多秋色。豈唯醒耳玉淙琤。照眼光寒如練白。舊聞瀑布垂雲間。恍疑銀河墮。

天關西望香爐不得往。箇中元有小廬山。

次董彥字韻兼柬之南

大門江南英。詩名重當時。兒時得其藁。同輩爭誦之。不及拜諸門。常恨生苦遲。只今諸孫子。籍甚皆能詩。大篇每投我。孰非黃絹辭。我詩不成句。落筆爲衆嗤。如人食土炭。嗜好終不移。君何獨賞味。與衆真異馳。相望巷南北。不面令我思。歌聲亦若哭。此意誰當知。阿大一門傑。相爲塵外期。風流竹林會。應許仲容隨。

次韻之南讀彥光詩有作

君家父子俱能詩。天遣淑鳥鳴春時。文窮抵掌定不免。齊竽不學君何疑。平生說詩喙三尺。只今塞吃成期期。願君高處古無上。抑以自警無邪思。

有懷覺範上人

道人心與貌俱古。哦詩不復効等伍。清疑仙掌露華墜。新似秋空玉鉤吐。要將餘事付風騷。已悟玄機窺佛祖。泐潭老子乳於菟。果在叢林嘯風雨。何當掃室祇樹園。夜看金盆聽軟語。我雖不是龐德公。懶駕柴車入城府。公如歸結白蓮社。留我山邊一廬許。

次韻彥光睡起病目

蜨夢遊揚臥碧紗。知君不賞玉釵斜。夢回起坐有佳思。亂觸牙籤書五車。黑蠅著眼君勿嗟。學道乃得青蓮華。商略此言當過我。樵青竹裏爲煎茶。

喜汪叔野見過

大汪權奇汗血駒。小汪連翩鸞鷟雛。垂頭未遇伯樂顧。覽輝將下朝陽梧。豈知青衫埋朽壤。更令斑鬢困泥塗。喜君翩翩過我廬。握手借問今何如。苦云難遂白髮志。揭來翻作青衿徒。急呼歡伯置坐側。解顏談笑聊相娛。語及阿兄平日事。往往屑涕長歎歔。怪君長不滿六尺。高談似是膽滿軀。且寬是事飲此醕。逢人但作鞦韆啼。苦留君住騎勿驅。明朝酒盡爲君沽。更闌月落起浩歎。四面宿鳥鳴相呼。

追和柳子厚二詩

讀書

吾生後淵明。頗亦念黃虞。要知千載外。所學須殊塗。兀坐對聖賢。無卷一長吁。彼智自明哲。惟狂益昏逾。一源同濫觴。派別乃差殊。我觀載籍中。世事何所無。癡人不識古。謂與古人俱。相望何遙遙。清都視積蘇。咄此不可獻。諷誦聊相愉。嗟哉子柳子。文章蓋羣儒。速進自貽戚。南冠成繫拘。天孫不與巧。溪神亦爲愚。讀書雖滿腹。何曾掇飢飮。乃知伋文輩。要路難齊驅。

飲酒

世故不料理。萬事付一樽。呼賓陳肴蔌。乃爾不憚煩。秩筵初嚴冷。稍稍笑語喧。有如鄒子律。聽回寒谷溫。哀哉獨醒人。顚顚拾蘭蓀。寧知阿堵中。端有妙理存。

寄題朱氏小隱園

吾聞滑稽兒。避世向金馬。刈草吉雲鄉。探鳳荒城野。斯人玩世耳。豈必膏廬下。牆車本僧牛。君平蓋卜者。朝市亦堪隱。山林實蕭灑。君居占深源。境物粲可寫。老檜上千雲。孫桐已拱把。雨窗修竹響。風磴寒泉瀉。此翁少年日。射巧如注瓦。百金裝寶刀。千金買流赭。晚歌紫芝曲。情性妙陶冶。蒲履縠皮巾。何取綬若若。嗟余亦曠蕩。與世□磊苴。方期訪桃源。更欲結蓮社。

次韻董之南見贈

章甫不入越。夏蟲多拘時。生無適俗韻。舉世誰知之。鍾嶸不並世。無人識邱遲。雖有落花句。知爲何等詩。如逢賀賓客。方歎烏栖辭。我初出險語。俗子爭唐嗤。俛眉欲從事。復恐遭文移。亦知適楚車。安可從北馳。董家名父子。平生所懷思。雖云識面晚。相聞已相知。君詩有古意。且結皓首期。端能啖杞菊。時復過天隨。陳循中求賦高麗墨。詩爲作長句。

老松收煙琢玄玉。可試洮州鴨頭綠。來從萬里古樂浪。傳到麻源第三谷。要須岱郡鹿角膠。擣成方解土炭嘲。請君摩研寫新作。一弄潺湲弔康樂。

竹友軒

舊時王子猷。愛竹僅成癖。斯人向千載。論世心莫逆。吾軒謚竹友。寓意比三益。俗士舊雨來。今雨定掃迹。願言登子軒。哦句呼阿客。看君陰森下。玉潤映連壁。龍吟秋夜永。臥聽風撼撼。或當命柴車。獨咏此君側。興盡悠然返。誰能暖君席。

貫時軒

畏夏苦執熱。開軒除鬱蒸。簷前鳥雀喧。朝旭上朱甍。席閒裁函丈。詩書浩縱橫。槃礴環堵閒。幽獨懷友生。古人在黃卷。千載使我傾。出門窺物變。草木各鮮榮。青青牆東竹。見汝忽眼明。愛玩不能忘。移根傍軒楹。俯仰與竹俱。定交見深情。不是無朋友。此君冰玉清。風吹萬籟響。寒梢韻竽笙。我獨哦其閒。詩作秋蟲鳴。琅玕亦有實。期汝向秋成。鳳凰何時來。翩翩翔我庭。

讀莊子內篇

經春十日爾。卻掃閒無車。伏枕夢鳴轂。淙琤行溜渠。端坐發深省。妙香浮素裾。盥濯披陳編。諷誦臨前除。陳編爲何誰。漆園傲吏書。奇辭通詼詼。空語極虛無。得意榮辱境。脫身憂患餘。胷中灌頂句。身上如意珠。逍遙有妙處。領略歸一途。塵影閱千世。風波連九區。投足寄其閒。鼎鼎一何愚。倘同蓬蒿鷄。勿笑溟海魚。

謝幼槃文集卷第四

古詩

陶淵明寫真圖

淵明歸去潯陽曲。杖藜蒲屨巾一幅。陰陰老樹嘖黃鶯。豔豔東籬粲霜菊。世紛無盡過眼空。生事不豐隨意足。廟廊之姿老蓬蓽。環堵蕭條僅容膝。大兒頑鈍懶詩書。小兒嬌癡愛梨栗。老妻日暮荷鋤歸。欣然一笑共蝸室。哦詩未遣愁肝腎。醉裏呼兒供紙筆。時時得句輒寫之。五言平淡用一律。田家酒熟夜打門。頭上自有漉酒巾。老農時間桑麻長。提壺挈榼來相親。一尊徑醉北窗臥。蕭然自謂羲皇人。此公聞道窮亦樂。容貌不枯似丹渥。儒林紛紛隨溷濁。山林高義久寂寞。假令九原今可作。舉公籃輿也不惡。

斷荅軒

萬鍾辭屠羊。五鼎貪主父。是閒多毒腊。可茹亦可吐。緬懷陶隱居。朝服挂神武。餌荅期卻老。曠蕩適林莽。我家城西偏。有地一廛許。開軒俯長松。倒影廕庭廡。嵌空宿龍蛇。隨暖藏雲雨。流脂入地脈。凝結歲月古。長鑱白木柄。生事聊付汝。想彼塵外人。遲暮肯同煮。但當捐兔絲。敢望擘麟脯。

約諸人遊羅坊觀

陽夏吾鼻祖。人物傾九州。閒攜東山妓。文靖極風流。屐齒步飛磴。快哉康樂遊。耳孫牛馬走。闕情無匹儔。但有愛山趣。尙能繼前修。頗厭城市塵。拘繫如楚囚。竭來龍泉上。杖履隨沙鷗。幽尋風露靜。江月動金虬。青山帶長江。佳氣日夕浮。旁有列仙家。丹□連飛樓。琴書靜無華。竹樹煩更幽。約我雲霞交。茲遊及清秋。朱絃蕩塵襟。芳樽寫牢愁。道士如彌明。長頸高結喉。初無石鼎句。嶮怪壓劉侯。從渠倚壁睡。吾屬足冥搜。無逸病目以詩戲。

六根無牢強。萬事有戕敗。丹白豈不加。能令眼根壞。溪堂老居士。學道入三昧。空花結空果。過眼了無礙。偶然幻翳侵。惱此清淨界。道人不易得。定爲天所愛。恐君墮塵劫。豫比小懲戒。病眸點空青。勿作兒女態。爲君禱于天。君病立當瘥。未忘覲詩書。不敢窺粉黛。

題戴崧石鼎聯句圖

衡山道士熊豹姿。夜過劉生逢說詩。止于座隅初莫識。口不能言心自知。坐中清逸校書郎。新有詩聲誰過之。豈知老子殊不淺。何但逐鬼愁蛟螭。須臾指鼎出佳句。脫略凡韻生新奇。二生得句不敢吐。鳴聲強作秋蟲悲。雙如窘兔避鷹隼。懷如敗將收旌旗。借問砥筆摹者誰。定是盤礴真畫師。退之斯文有妙處。丹青寫盡初無遺。彌明學道如不死。應在衡山深處栖。端能過我挑詩敵。與君周旋吾敢辭。

讀葛洪傳

葛洪鍊丹砂。卻老得遐壽。鶴駕安在哉。巖穴遺井舊。勞生亦何爲。荏苒度昏晝。煌煌崑山芝。未暇搢三秀。

寄謝浮邱翁何由挹其袖

讀三都賦

漢遭陽九運。無復見中興。不聞黃屋處。郊野蔽旗旌。三人已成虎。況阻三國兵。揚塵日月暗。喋血郊原腥。作都雖云美。其如九鼎輕。十年翰墨手。模寫費丹青。人與骨俱朽。山川空炳靈。吾懷鮑明遠。寂莫賦蕪城。田父招飲不赴

萬錢供食如嚼蠟。百壺載酒如飲水。要知自古窮達人。脫略世味皆如此。經旬不逢南鄰伴。曲肱聊寄北窗底。田父剝啄扣我門。頗應昨夜燈花喜。殷勤攬衣謝父老。陶令愛酒今朝止。伏雌可殺葵可羹。他日薄飯招鄰里。吾君恭儉似文帝。勿爲酒醪傷穀米。

喜雨是日聞改元

涉冬無一雨。元冥阻驕陽。上田塵沙飛。下田蒲稗荒。鋤犁不入土。龍具挂壁牆。村居巷無井。抱甕汲長江。汲多恐流絕。無以飲牛羊。昨宵天意動。浮雲羃月光。灑然潤物功。洗蘇及枯楊。先帝劍弓冷。小臣涕淚滂。屬聞建中號。謳歌騰路傍。雨從膏澤沛。風與和氣祥。山林獨何幸。預喜霑稻梁。尙能賦時雨。激烈歌阜康。余賦野香亭前不犀花二小詩盛稱此花之妙而江迪彝賦梅花詩以反之往返唱和十數篇二花優劣未決故復長韻示之

君不見杜陵布衾冷如鐵。朝來米盡炊烟絕。偶然乘興江上行。無奈被花惱不徹。城南陋巷在江涘。讀書

蒲團生蠨蛸。吟成少陵七字詩。酷愛梅花似冰雪。竹友道人端可噉。頰髭如棘手如龜。從來口業洗未盡。醉吐狂辭歌木犀。賞花自是少年事。出口未覺我儕癡。我今束縛喙三尺。勿與世俗爭妍媸。空花徧世不礙眼。淡如雲水老禪師。

寄題王立之賦歸堂

小官五斗米。達官五鼎食。均有懷祿心。細大各封殖。疾驅挽不還。此輩車轂擊。王侯生綺紈。雅意在山澤。頗賦歸去來。作堂慰休息。似聞一尊酒。醉眼分青白。何時上君堂。酌酒話疇昔。和君五字句。想望柴桑陌。亦愛軒

漆園游濠梁。得意鯁魚樂。淵明愛吾廬。感彼衆鳥託。兩賢俱達道。妙處要商略。夫子誰與歸。潛也如可作。柴桑久無人。茲道竟寥落。頗能誦其詩。尙友亦不惡。世路多艱險。君軒可槃礴。但恐君出遊。蕭朱綬若若。求定齋

吾觀大梁城。九衢塵暗天。蠻觸日交爭。夔蜺互相憐。此心如慈幡。裊裊風中懸。王子閉門臥。守心長縛禪。能定乃能應。如鏡別醜妍。吾豈匏瓜哉。孔子有至言。君看日月行。亦若磨蟻旋。涪翁已發藥。此句不用傳。黃魯直爲名此齋。并道其名齋之意。

寄饒次守

我初叩角時。聞有饒進父。次守舊字進父。破衣下里舍。應書不得舉。要是磊落人。白眼看法度。吹笙彈箏

篋餘事能律呂。市人惡少年。往往爭笑侮。掉頭出里門。徒步大梁去。蒯縠謁王公。敝貂走風雨。十年不還鄉。無人問死所。客從北方來。喜氣滿眉宇。探懷出君詩。字字粲瓊組。筆縱入顏楊。句法窺李杜。奇偉可畏人。我輩誰比數。借問從誰遊。一一英俊侶。我家阿夷兄。詩有春艸句。說君不離口。恨我識君暮。帝城十二衢。素衣染黃土。食貧出無車。羈旅亦良苦。束書早歸來。隻鷄祭墳墓。況聞霍將軍。尙有陳氏母。銅山鬱嵯峨。其下原臙臙。我思結茆舍。帶經學農圃。它日如買鄰。定可連牆住。頗聞君卜昏。我亦未有婦。要如子柳子。各娶老農女。東市買杯杓。西市買筐筥。南市買綆缶。北市買飯釜。生理能稍稍。來往辦難黍。兩家如有子。男女互嫁娶。從來不識面。便作平生語。但緣臭味同。請君莫訝許。

讀潘邠老廬山紀行詩

杜陵骨已朽。潘子今似之。歛觀廬山作。乃類北征詩。是家好男子。札翰非凡兒。阿爺有新句。把筆如畫錐。此詩落吾手。三復喜可知。有才如長卿。武帝思同時。不令歌天馬。亦合賦靈芝。胡爲鬢已凋。但作愁苦辭。錦囊勿妄發。恐爲俗子嗤。

汲古齋

人言曲誤周郎顧。豈謂周郎真好古。長歌短調各風流。說盡心招及眉語。頗聞汲古用脩綆。乃知餘事工律呂。君軀三尺膽如斗。欲窺唐虞探鄒魯。頃來長安闊畫眉。時人半額相媚嫵。天姿潔白惡丹鉛。獨有溪頭浣紗女。要知學者用心處。不追時好乃如許。君家有井千尺深。容我時攀轆轤否。

寄李商老

所思定何方。渺然荒山麓。別來經一年。不寄書一幅。憶在元真館。與君同飲缸。論文久未去。夜雪打寒窗。明朝款君門。復輿踏殘雪。尊前聽君談。意氣排凜冽。雪中兩相過。把酒俱留連。豈同剡溪去。興盡回酒船。今年走東吳。無復相邂逅。邇同行路難。歸已三月後。逢君所知人。頗嘗問君安。猶聞臥苦塊。毀棘今爨爨。君家所嬌兒。聞已去懷抱。昔我嘗見之。瑤環實娟好。我歸臥衡門。愁苦亦如君。淋雨子桑病。敝冠原憲貧。此懷其誰語。思君何能已。寄聲勞苦君。兼問兩季子。

謝幼槃文集卷第五

律詩

集庵摩勒園觀李伯時畫陽關圖以不能捨餘習偶被世人知爲韻得人字賦六言

摩詰句中有眼。龍眠筆下通神。佳篇與畫張本。短紙爲詩寫真。渭城偶落吾手。小圃傳觀衆賓。坐上宴如居士。暗中摸索離人。

次韻董彥速送珍上座還漳江

阿師身小膽能大。文字曾追權可遊。珍云曾從權可二詩僧也。尋山紅葉半旬雨。過我黃花三徑秋。隨處龐公雖有偈。它年支遁恐難酬。經行若箇門風是。聞說漳江似趙州。

招李成德

妙年英偉定樞枘。老大如樗百不堪。黍飯莫孤元伯約。山夫豈有德公談。某無多算愧三北。詩要重論窺二南。只恐尋芳嗟較晚。夜來風蕊落麝毳。

採金櫻子

三月花如蘊蔔香。霜中採實似金黃。煎成風味亦不淺。潤色猶煩顧建康。

讀何易于傳

吏皆愁死自焚詔。農正勤耕身挽船。墨綬紛紛滿天下。不知誰拍此渠肩。

讀嚴子陵祠堂記

羊裘不見釣臺傾。山到臺邊分外青。天上故人新黼黻。身前萬事一簪簪。章侯筆法逼秦相。范子文章原易經。圖畫名臣久磨滅。此碑千古粲繁星。

觀漁二首

腹腴端可飽新歡。柳貫霜鱗照眼寒。莫惜寶刀煩玉腕。要看飛雪下金盤。

二

活我波閒雙鯉魚。待傳千里故人書。嬌蛾莫道留君掃。怕捲珠簾總不如。

潘邠老嘗作詩云。滿城風雨近重陽。邠老亡後無逸兄用此句。足成四篇。今茲重陽。只數日風雨不

止。淒然有懷。作二絕句。念泉下二人不再作。不覺流涕覆面也。

地下修文兩玉人。清詩傳世墨猶新。卻因風雨重陽近。獨立蒼茫淚一巾。

二

阿兄溫潤玉界導。我友淡薄朱絲絃。只疑蟬脫遊人世。醉插茱萸若箇邊。

隱居

清時甘小隱。卜築在山阿。家有傳蠶室。機如凌行婆。閒看斬貓話。羞作扣牛歌。不出又三月。柴門生薜蘿。

秋日登擬峴臺二首

步上溪邊百尺臺。斬新秋色正傷懷。千屏翳繞碧雲合。一字欹傾鴻雁來。

二

徘徊欣與賞心同。讀徧碑詞字字工。共歎黃鍾封白壁。一時悲淚灑秋風。

秋暑

秋暑不可奈。秋風殊未來。何時疎畫扇。無處覓涼臺。誰謂月離畢。空驚山殷雷。愁聞老農語。南畝半黃埃。

寄汪信民二首

泮水傳經老。蓬山佐著才。宦游思引去。祿養可歸來。要路眼誰白。浮雲心自灰。少年馬何駛。君馬獨虺隤。

二

繫纜符離日。君行殊未歸。寄書問亳社。有夢向江西。不見揮犀柄。頻驚響馬蹏。殷勤且雞黍。多謝德公妻。

喜董彥速自仙嵩歸

鉢囊高挂同僧夏。遠寄嵩間一把茅。地僻狢猴長作伴。食貧蕨筍不充庖。瘦藤拄下萬峯頂。野鶴來歸千歲巢。點檢篋中詩幾首。蒼頭時遣爲君鈔。

莫莫堂新竹

僻寂漏茅屋。蕭梢新竹枝。徑迷人不到。蔭密鳥還知。綠色恣恣換。薰風細細吹。卽看柯葉老。不受歲寒欺。

夏夜對月

掃月追涼清夜分。是閒風露別乾坤。山林畏住地多籟。雲漢昭回天不言。平野極瞻南紀闊。稀星遙拱北辰尊。時平萬里無兵革。靜愛雞鳴犬吠村。

煎粟粟湯二首

萬粒勻圓剖罌子。作湯和密味尤宜。中年強飯卻丹石。安用咄嗟成淖糜。

二

松黃浮椀色蒸栗。初味餘甘如苦茶。粉粟爲湯兩奇絕。甚甘純白勝醍醐。

問劉世基疾

君如寒涕癩瓊師。如何久苦造化兒。清漳嬰疾古所歎。淋雨裹飯今其誰。探囊苦乏萬金藥。歷眼疇爲三世醫。它年上疏恐不免。細君莫念眠牛衣。

蔡師直畫山水研屏二首

畫翁元勝斲輪扁。喻子丹青如有神。平遠還堪助詩思。故疑摩詰是前身。

二

淡墨江山作小屏。碧紗煙裏護寒泓。蟾蜍寫盡看倒影。身在山陰佳處行。

和季智伯病中書事四首

多病過嗟蒲柳弱。故交聞似曙星疎。逢人休問金篋術。殺簡宜翻石室書。

二

訓釋雖工非世好。風流未減已形枯。固知商也真無罪。豈謂穹穹不可呼。

三

應知露肘貧堪忍。只有哦詩興未疎。莫遣木蘭當戶織。須煩阿買八分書。

四

老來頓驚詩筆退。愁生唯怕酒腸枯。尊前學得新翻曲。早晚揮杯幸見呼。

春寒

冉冉雲生嶺。翻翻雨決渠。畏寒成謹戶。惡溼問生魚。始怯春衫薄。俄驚團扇疎。天憐憔悴骨。莫遣峭風梳。

觀碁

客憩茂林晚。風生涼簾秋。從橫飛碎玉。勝敗決中流。北叟暫亡馬。西風還覆舟。誰能關許事。寓目且忘憂。

喜晴

十日江村煙雨濛。曉來初快日升東。揆莎蕉葉展新綠。從史榴花開晚紅。得句又從山色裏。發機渾在鳥聲中。披衣出戶眎四野。好在良苗懷晚風。

送和香與彥速二首

侯莎新補蔚宗傳。藿燥齏黏疑可憎。試炷博山元不俗。小匱分供在家僧。

二

窗閒一炷結趺坐。萬象森前應眼□。不印香嚴薰未歇。何妨人誚太□僧。

暮春久雨

季月何多雨。經旬不見山。雲師工蔽塞。羲馭久閒關。水已澤中滿。寒應天際還。壞牆憂盜入。只益鬢毛斑。

晚春書事二首

春來畏病不飲酒。孤負山南山北花。有客款門驚剝啄。無人追韻得車斜。獨酬砌下二三子。豈憶城南韋杜家。不畏詩窮嫌水厄。時時搜句養新芽。

二

未曾留客十觴醉。已是飛花三月時。忽悟病來真老矣。倘逢聖處一中之。眼前用意半乾沒。世上忘形皆白癡。誰似陶翁有名酒。呼兒覓紙又題詩。

和陳虛中與呂少逸唱酬口號

霏霏玉唾勝三語。灑灑金荷傾十分。檐外催詩疑有雨。林閒張幄豈須囊。臨溪尙憶童時釣。問俗仍寬柱後文。殄重兩公新句麗。落花依草競紛紛。

螢火

日出知何許。宵行有底忙。自疑緣寸草。不敢近扶桑。瑣碎豈堪數。神奇安得長。微風迹未掃。更待九秋霜。

七夕書事

燒燭留今夕。銜杯憶故年。風前失二士。句裏問三絃。隨分瓜蔬設。占星古老傳。不須文乞巧。只有直如絃。

朱濠州挽詞二首

俊軼金閨彥。風流粉署郎。憂民形玉色。治郡輟鸞行。籍甚聞前席。居然歎掩芒。何人殺青簡。惠政在濠梁。

二

公才真霹靂。令德故從容。未錫九環帶。俄傾千丈松。清香銷燕寢。遺札陋登封。身後累累印。紆青已二龍。

哭無逸兄三首

久客思鄉社。長歌去國門。還家未偃息。樹繞忽飛翻。苦淚不勝滴。悲懷誰與論。平生急難處。愁絕望鴿原。

二

文口不用世。歲忽值龍蛇。遽使賢人隕。長興志士嗟。有兒纔句讀。無地可桑麻。賴有興元尹。能賙孟氏家。

三

溪堂載酒地。無復故人車。敗壁龍衣委。荒畦馬齒疎。淒涼閉關賦。淪落廣徵書。但有清風在。時時爲掃除。

題于逢辰畫

踏徧江南岸。歸來試解衣。誰言物外賞。不與筆端違。石帶蒼苔瘦。風凋折葦稀。令人清興發。欲問釣魚磯。

戲咏石榴晚開二首

靡靡江蘿只喚愁。眼前何物可忘憂。棟花淨盡綠陰滿。纔見一枝安石榴。

二

無復幽姿淡淡穠。胭脂深染薄羅裳。芙蓉影裏避三舍。石竹叢中許擅場。

端午卽事

卯飲緣佳節。菖陽薦一卮。兒謔射糲事。妻誦賜衣詩。懶檢三閭傳。爭纏五綵絲。平生幾端午。隨分作兒嬉。

書李元亮眞牧堂賦後

揮翰眼中元亮牧。牛何處。羶仙公擇如今不泯。當家諸子俱賢。

題陳陽樹石二首

寒藤高數百尺。枯木大七八圍。挽取到公奇石。俱還數幅寒溪。

二

解寫枯松潤石。陳陽筆意名家。弟子蔡規今老。古人王宰何加。

哭汪信民二首

竟欲游梁苑。聊甘食楚萍。談經謝執袴。植髮想槐庭。看鏡鬢毛改。橫空煙霧冥。誰評貞曜證。更謁退中銘。

徐穉生何陋。袁宏輩豈如。誰知十斛水。中有百金魚。肘見貧非病。疽成憤不摅。銘旌返南國。寥落正愁予。

杞菊

雨洗幽叢清客襟。腐人採掇獨何心。根苗扶老或名杖。蓓蕾舒黃無數金。

絡緯

聒人長向井邊啼。在字丁寧戒授衣。織素盡輸官事了。秋來工女正投機。

倦夜

山月斜臨帳。山風細拂裳。蕭蕭碧煙靜。炯炯白閒涼。境寂萬緣息。心灰千慮忘。無端催曙鳥。底事厭宵長。

喜董之南歸

乾鵲飛翻噪晚林。阿南歸騎果駸駸。青衫黃綬霑新命。白石清泉是素心。金鑷多情洗雙鬢。葛巾從此避華簪。來年往獻東巡頌。今日聊爲梁父吟。

懷祥首座

師在羌廬西復東。無心還似鳥飛空。月鉤雲幕今何處。禪板蒲團只眼中。未悟竹閒鳴瓦礫。擬隨童子問鈴風。前身倘是胡居士。打破虛空對沼公。

謝幼槃文集卷第六

律詩

寄李商老兼柬文若季弓

有客春來傳尺書。書詞字字敵瓊琚。經時伏枕沈縣甚。異縣論交消息疎。物外高情想三鳳。眼中何物當雙魚。遙知小弟淒涼意。騎省歸來正望廬。

晝臥二首

書魔纔挽睡魔推。鼻息俄驚吼怒雷。夢到逍遙大庭館。不堪檐外鳥呼回。

二

剝剝啄啄無俗客。清清泠泠多好風。一枕本無憂樂累。何須遊宦大槐宮。

青精飯三首

霍山王鄧兩真隱。駕鶴乘雲飛九天。當時服餌定何物。同飯青精三十年。

二

從來見說青精飯。晚遇真人隱訣中。長恨聞名不相識。那知俚俗號烏桐。

三

南人雖號烏桐飯。過熟翻成作淖糜。太極真人方未試。茅山道士寄何遲。

送酒與晏如居士二首

南人釀酒詫深紅。注瓦真成琥珀濃。與藥相投莫宜此。急分多病晏如翁。

二

此翁曾把春償酒。醉插姚黃更乞花。多病只今猶解飲。細傾聊爲遣生涯。

示李商老兄弟

月夜宜披宮錦袍。定知公輩豈蓬蒿。文□修水波瀾闊。人與廬山意氣高。伯氏最於三虎怒。凡兒何翅九牛毛。相逢徑欲倒家釀。莫厭尊前持蠅螯。

夏日遊南湖

麴塵裊與草爭綠。象鼻筒勝瓊作杯。可惜小舟橫兩槳。無人催送莫愁來。

咏金來禽

枝上離離金彈丸。宜隨玉食薦金盤。從來物以遠爲貴。酷愛閩中荔子丹。

書懷

賴有書遮眼。初無客就談。身閒唯取醉。髮短僅勝簪。學僻今何用。囊空寶不貪。老師行駐錫。準擬問前三。

次李商老端字韻

胷中磊磊夜光寒。霹靂驚飛在舌端。夢去幽尋遶山麓。詩來喜色上門闌。四時更運不疾湍。兩鬢凋零壯心在。忍窮懷抱若爲寬。

招汪叔野

夜語僧窗雪載途。別來夏木又扶蘇。兩牛鳴處地非遠。萬竹陰邊吾所廬。兒能竊聽從忘筆。子盍徐行可當車。莫訝南鄰狂處士。撻撻傾坐一軒渠。

投贈通守陳虛中

前驅負弩旆旌忙。凜凜寒風挾曉霜。人道姦藏有三穴。公知民病極千瘡。搖毫端是霹靂手。抵几還驚鳧鷖行。莫向琳宮坐閒冷。太阿何事匣中藏。

晚晴步塘上

漫踏斜陽隄上行。偶逢白叟問年登。去年禾乾龜兆圻。今年雨多禾耳生。

鳴鳩

雲陰解盡卻殘暉。屋上鳴鳩喚婦歸。不見池塘煙雨裏。鴛鴦相並溼紅衣。

聞呂居仁病未瘥。覓使寄問。

消渴文園苦病多。蕭條子美臥江沱。士窮不遇古如此。天實欲爲人謂何。忠義名家忝申許。文章秀氣望

岷峨期君煉玉養白石。色比嬰童何翹過。

種竹

關地種修竹。得方緣祕經。成陰向北戶。倒影落中庭。直取內含素。豈惟枝鬪青。龍鍾玉川子。猶擬抱添丁。

次韻季智伯寄茶報酒三解

歡伯風流可解憂。疑君此外更何求。揀芽投我真拋卻。不是能詩薛許州。

二

二生相逢妾換馬。我今真成酒易茶。腐腸銷膏亦可戒。與子服霧殮朝霞。

三

君如張籍學古淡。麗處往往凌陰何。長句短章時寄我。爲君翻入竹枝歌。

懷鍾陵舊遊

五年二度過鍾陵。馬上春風醉裏醒。南浦江波迷眼綠。東湖煙柳半天青。從來地域歎卑薄。怪底山川終炳靈。又見徐家有高士。他年重作聘君亭。

湯泉泉在法水寺後

亂泉如沸出灣環。餘燠猶霑野寺間。但與山僧洗塵垢。還勝漲膩在驪山。

端爲懷黃取醢烹。豈緣多足恣旁橫。焚臍未用集鼠輩。椎髓方

二

分付廚人苦見嫌。十臍元有九臍尖。要知其中未必有。輸與蛤蜊如蜜甜。

三

論功直與酒杯同。何事生憎在水中。不使落湯頻下箸。終令骨醉耐春風。

四

有國嘗憂以味亡。須知有毒味中藏。誰能不累口腹事。莫趁秋風啣稻芒。

以牛膽漬槐子遺董之南二首

雪霜無賴點君鬢。五十龍鍾成老翁。急分槐實要腦滿。佇見頭青雙頰紅。

二

解牛得膽大如斗。投以元槐功更加。來歲青袍映綠髮。不妨看盡九衢花。

送王坦夫由淮南入京

王郎乘興上扁舟。數遣書來寫我憂。奏牘三千待金馬。卷簾十里夢揚州。桃花水漲理歸櫂。蓮葉杯香銷客愁。白髮倚門長望子。細君應賦大刀頭。

遊安樂寺陳妙音載酒

遶郭尋春未見花。不知春在梵王家。林閒新翠張褰幄。席上殘紅當臉霞。興逸持杯睨雲漢。飲酣揮翰走龍蛇。主人不是陳驚座。投轄歸時日已斜。

聞無逸兄下第歸

豐林分手各消魂。兄弟傷離況玉昆。初謂過都留虎脊。又令點額向龍門。往聞淮北雪花大。歸值江南梅雨昏。欲寄短書無別語。年來花柳自村村。

李簿家有侍兒妙麗善歌舞諸人惜其死爲賦詩予亦賦二首

草頭朝泣露漙漙。樵歌暮歸邱隴寒。當時座上客半醉。琵琶不許近簾彈。

二

郎子風流栖枳鷺。枳上單栖泣夜闌。窗前邂逅一笑粲。夢中猶作在時看。

久旱喜雨

誰言旱魃虐。敢奪雨師權。瀾漫溪流漲。瀾翻屋雷懸。占年豐穰稴。快意滌祥延。疎懶知何幸。茅齋穩晝眠。

植菊

憔悴靈均老。蕭條子美醒。淪英謀自潔。摘蕊恨猶青。事往成今古。人亡尙典型。老夫今白髮。賴汝制頽齡。

有懷如璧道人二首

道人詩思瀉江湍。乞食侯門缺屢彈。鋪褐臥雲何處去。不應投老累儒冠。

二

每憶詩人賈浪仙。投冠去學祖師禪。塵埃不染心如鏡。妙句何妨與世傳。

寄王立之二首

二

坎壤修門裏。蕭條處士廬。惜人玉川子。憤世竹林書。家有來禽帖。門無載酒車。諸公生死隔。不是故人疎。舌本初傳強。仍聞右臂枯。經春一句臥。見客二兒扶。吾道何寥閔。夫君合洗蘇。世無湔浣手。藥味且時須。

贈別董彥速四首

二

人間底處異遽廬。莫莫堂中豈定居。我尚滯留君去速。荒園三畝夢歸歟。

三

多謝清風日掃庭。與君同種菊青青。開花爛熳君何在。莫忘蕭條我獨醒。

四

欣同衆鳥托吾廬。投杖行當歎索居。不是酸寒孟東野。吾言能聽果誰歟。

機事都捐憶大庭。茅檐相對眼俱青。期君別後文章健。往弔沅湘屈子醒。

次韻無逸兄見示

憔悴誰能賦大招。會將菌桂雜中椒。巷南鄰里頻相過。水北山人詎可邀。細酌敢謀長袖舞。苦吟空咏寸
岑遙。耕耘賴有陶潛婦。不羨孫郎對大喬。

次汪信民寄無逸韻

詩翁索莫閉門居。珍重山陽信不疎。但報七言當玉案。何須千里駕柴車。樂天官滿應歸早。揚子家貧只
晏如。它日往來隨二老。共甘盂飯與盤蔬。

送酥魚頭醬菜與何之忱三首

和蜜煎膏學雍酥。兒誇甘味比醍醐。老夫舌本不知味。強解嘲爲羊酪奴。

二

放浪三江又五湖。頭顱見醢亦何辜。世無剛者不用覆。往侑一觴隨蜜酥。

三

甕底寒蔬冬作菹。春來把酒必時須。庾郎鮭菜二十七。還得何郎下箸無。

立夏日作四絕

雨脚連雲苦未收。曉驚池面日光流。田家甌裏封蛛網。卽漸歌謠麥有秋。

二

小簾含風六尺牀。竹奴從此合專房。吾身瓠落都無用。占得山閒一味涼。

三

熨得絺衣一番新。幅巾輕軟最宜人。花時氣暖長愁夏。竹裏風微又勝春。

四

學作蒲葵扇未工。手揮聊有古人風。君王別用機中練。定破南來長養功。

寄劉世基用世基寄之忱韻

斷堊誰能鼻不傷。虎賁何取似中郎。吾人身健閒何闊。昨日書來喜欲狂。華屋不存長念昔。用文靖事。金蛇雖在莫干梁。用劉氏事。幾時燒燭留君語。更向東窗置一牀。

招李商老兄弟時聞權守陳公留之未聽其來

十年不見令兄弟。眉宇長懷元紫芝。栩栩夢魂成獨往。翩翩書札慰相思。求船貨馬事應速。酌醴焚魚豈辭。政恐孟公投轄飲。惜君高論解人頤。

次劉世基韻

孔世已傳三十八。諸孫猶自見長身。試將後謝追前謝。豈料今人愧古人。華子岡頭千疊秀。劉郎詩律一朝新。吾家碧澗紅泉句。聊欲煩君作後塵。

用前韻和董彥速

得句可傳千古意。搜奇攻苦百年身。河梁贈別初無對。錦里吟春復有人。我已汗顏驚手縮。君猶瓊樹賞。

朝新。從今習氣須磨盡。二字唯當悟客塵。

夏日書事二首

蒼虬蟠礎濕生雲。翠荇搖風水有紋。涼臥北窗呼不省。蟲飛遶鬢夢中聞。

二

雲峯矗立駐金鷄。夢斷槐宮影未斜。屏翳御風遊不返。南山空轉阿香車。

余嘗會李商老於海昏。識呂居仁於符離。今已五六年矣。偶見二公偈和詩。各次其韵一首。

憶昔逢君夜雪中。高談未了酒尊空。清連綠篠今輸我。白壁黃金政負公。渭水流清終異濁。池花變碧舊曾紅。欲評此意君何在。長是蒼茫立晚風。右寄商老。

維舟濁汙偶相逢。彈鋏歸來四壁空。耕道十年常九潦。謀身一國自三公。似聞諷諭能知白。豈作詩詞要比紅。中國凜然生氣在。故知郎子有家風。右寄居仁。

謝幼槃文集卷第七

律詩

玉茗花

佳園昨夜變春容。清曉驚開玉一叢。素質定期雲液白。淺粧羞退鶴翎紅。似聞金谷初無種。欲畫鵝溪恐未工。底事餘花避三舍。孤高元有使君風。謂魯公也。
騷人浪說麻源谷。本在風流刺史家。直與瑤林共高徹。可須梅影鬪橫斜。芳樽莫待紅粧賞。幽豔長令烈士嗟。憑仗邊鸞折枝手。應宜展障玉鴉叉。

謾成

年來任運學騰騰。愛酒還同醉李僧。痛飲亡何緣客至。時穿不借遠村行。檐閒燕雀新聲好。門外池塘春水生。曉起坐窗無一事。捲書南望見高稜。

飲酒示座客

身前不吝作蟲臂。身後何須留豹皮。劬勞母氏生育我。造化小兒經紀之。牙籌在手彼爲得。塊石支頭吾所師。偶逢名酒輒徑醉。兒童拍手云公癡。

和季智伯金石臺不見舊題之作

瘞鶴書蹤逸少齊。華陽長使後人迷。姓名不得芙蓉手。何用全牛捧硯題。

二

復憶高人張季鷹。每將杯酒勝榮名。登臨叔子緣何事。湮滅無聞一愴情。

悼亡三首

舊聞林下趣。既見卽心降。月冷同秋夢。燈寒對夜窗。孰知身是幻。深念涕如江。仰歎朝飛雉。微禽亦有雙。

二

三公吾豈取。曾爲忍飢寒。擬聽箴簪雨。潛悲苜蓿盤。煙雲昏璧月。霜露殞香蘭。佇立東風泣。忘情良獨難。

三

去作三秋隔。來歸二載餘。臨風還念汝。傷女更憐渠。顙顙衣園滅。飄零鬢髮疎。吾今多病久。誰付茂陵書。

呈無逸兄

漢儒章句文勝質。魯國衣冠實愧名。但遣詩書長在眼。可令聲利苦關情。咄嗟茗飲有時辦。夢想溪堂何日成。舟泊寒沙臥明月。此期終欲與君盟。

示舍弟

蕭然環堵獨何有。自謂過人唯一邱。野性定爲滄海客。妙齡須寄道山遊。江寒沙靜鵲鵲晚。雲闊天低鴻

雁秋休歎鳥衣成往事。一樽相對且忘憂。

寄桃鄰居十

桃鄰野客無消息。寄食招提豈定居。倘有龐公知德操。何須程鄭識相如。食魚它日勞彈鋏。舐痔今人剩得車。流落生涯俱寂寞。因風時遣一行書。

寄無逸四首

三足祥鳥曾集冠。平生菽水奉親懽。從今五鼎應無補。不可奈何君自寬。

二

聞說潘郎窘食貧。何年會面慰艱勤。北風如有齊安使。爲報相思頻夢君。

三

故園風物長如舊。松柏參天六月涼。岑寂北窗風雨夜。獨吟詩句遶胡牀。

四

浩蕩漳江瀉碧漪。西山清絕助新詩。好因歸雁傳佳句。要見羊何共和之。

觀李伯時陽關圖二首

坐對丹青傷別離。淚和朝雨想頻揮。道邊垂柳年年在。看盡行人長不歸。

二

春草春波傷底事。青青柳色最銷魂。龍眠自有離家恨。貌得陽關烟雨昏。

秋興

雨隔千山暮。風驚一葉秋。朱顏傷露槿。青眼賴沙鷗。畏酒游揚夢。因詩點染愁。有懷誰與語。多病獨登樓。

聽曹道士彈琴二首

淡泊絲絃誰與聽。試開塵匣寫幽情。琴中自有無窮怨。彈出離騷意外聲。

二

小窗疎箔列仙家。彈盡遺音晚景斜。賀老當年定場屋。虛將妙曲付琵琶。

寒食出郊

水晴鷗弄影。沙軟馬驚塵。密竹斜侵徑。幽花亂逼人。深行聽格磔。倦憩倚輪囷。往事悲青塚。年年芳草新。

寄洪鴻父

兒時訪道漳江上。燕雀羣中見阿鴻。南浦飛雲看畫棟。北窗欹枕颯□□。讀書長憶登山勝。作尉聊甘食薺窮。想見咏懷非一首。鉤章棘句定能工。

有懷潘子真

沖和庵裏潘居士。旅食京城久不還。玉吐銀鉤長在眼。瑤林琪樹未承顏。大門曾是鄭嚴輩。吾子卻居夷惠閒。想見紅塵車馬底。夢魂隨鴈過西山。

食菜

道人真是伊蒲塞。頓頓園蔬入饌來。紫芥寒菹參薤韭。黃橙苦酒伴鹽梅。蒸豚不羨貯人乳。飯豆亦能羹芋魁。但恐酪奴不解事。攪令枵腹轉春雷。

暮春二首

溜渠鳴玉雨成霖。春草池塘數尺深。後院落花入不到。無聊獨下海棠陰。

二

晚雨牆東暗綠槐。清陰庭院鎖莓苔。委堦紅藥將春去。貼水清荷與夏來。

春日黃梅花二首

臘梅初與雪爭妍。素豔寒香亦可憐。政使北風吹得盡。一枝金萼始嫣然。

二

傍人如笑不勝妍。曾是尋芳向臘前。縱使遊蜂能拂掠。含酸結子爲誰圓。

梅花四首

姑射神遊閱九關。水精宮殿不勝寒。下窺人世生塵想。故作梅花與俗看。

二

清曉微開淺淺黃。蕭疎無奈北風涼。幽姿不許人窺見。故向寒林度暗香。

三

薔薇露染玉肌香。疎影寒光照野塘。長使詩人動幽興。不妨桃李鬪春粧。

四

冷香零亂點寒莎。眼底愁生萬種多。收拾餘芳無處惜。只傳佳句似陰何。

送都仲獻

酒曹懷璧暫投閒。俄許朱轡未賜環。殿閣涼生應在眼。宮門騶唱合趨班。鳳皇觀德翔千仞。虎豹窺人儼九關。只恐蒼生傾望久。未容投絨老家山。

寄題長沙高善時醉月堂

亂山岑秀繞湘濱。君築茅堂底處村。蠻國戈矛真夢幻。醉鄉風露別乾坤。平生不負南樓興。何日能同北海樽。聊欲揮毫書楚些。憑君招取獨醒魂。

與江君佐遊五福寺觀竹二首

老子平生與竹羣。清風灑濯勝三熏。江郎定自興不淺。共打僧門乘此君。

二

小池環插碧琅玕。氣韻蕭梢六月寒。一夜清霜羣木落。獨留孤節與君看。

題吳彩鸞寫真

天上鳳皇難獨宿。人間翡翠本雙栖。丹青不與文簫共。誰遣雉東迷雀西。

戲咏鼠鬚筆

編鬚捋取蝟毛磔。裁管縛成鷄距長。誰言鼠輩不足齒。也復論功翰墨場。

山閒四首

籬落秋花未得霜。嫣然一笑媚秋陽。可人風味撩詩興。不記姚家宮樣黃。

二

野老緣岡拾墮樵。溪童收網度橫橋。高懷盡在行歌裏。豈信人間有市朝。

三

未羨顏生樂一簞。一簞懸磬若爲慳。有田如使揚雄足。亦學前賢在澗槃。

四

舉案齊眉老孟光。隱居無計可須忙。殘年但使糟牀在。亦付生涯與醉鄉。

移松二首

古貌蒼髯十八公。巍巍獨出衆材中。朝來挽致茅堂下。爲我商量送好風。

二

河出崑崙派九州。屹然砥柱立中流。蒼松若比邱山重。豈但回頭費萬牛。

次韻吳民載告別覓酒二首

君詩起予者。百徧爲君開。世俗唯何甚。予心不可諧。獨思南去楚。衆欲北之回。何處可休影。期君歸去來。

二

齊下老從事。相逢青眼開。有朋方惴款。得汝更談諧。老興此非淺。後車君與回。嘉蔬實空甌。併遣木奴來。

偶書二首

大儒讀書如布穀。小儒據几如王孫。道人竟日無一事。臥看前江煙雨昏。

二

平生蹇吃不解語。終日坐窗從客嘲。它年若使登要路。定被人譏無口匏。

題陳先生華山高臥圖

落葉開花秋復春。睡中榮悴豈關身。那知五起雞三唱。亦有寒窗不寐人。

和董彥光立春日二首

梅蕊飛翻柳色新。雪泥乾盡已成塵。愁看節物獨驚眼。醉吐詩詞君可人。藜杖應門原憲病。鸛裘貫酒茂陵貧。朝來似有飛揚意。可但無情草木春。

二

交情自昔白頭新。富貴移人或望塵。顧我喜求方外士。得君端是眼中人。謫仙詩富舊無敵。東野囊空今

不貧已遣摻摻縫古錦。共搜佳句賞新春。

彥光示詩有釋氏之語復次韻

歷眼浮榮逐日新。誰知澄寂本非塵。吾曹例作區中士。此味全輸世外人。空裏華生均是病。衣中寶在卻憂貧。是閒枯淡君姑置。且辦芳樽醉早春。

何之忱用前韻示詩復次韻

楊子牢愁更美新。賈生悲鵬在承塵。忘懷久已栽萱艸。行樂尤欣見玉人。邂逅題詩聊可意。平生嗜酒豈憂貧。明年剩作顛茫計。劇飲狂歌莫負春。

從陳妙音覓酒二首

雪窗癡坐撥寒灰。萬斛清愁掃不開。排遣此懷將底物。憑君催送麴生來。

二

長恐閨人抱頸羞。何當更脫鸛鴦裘。試煩郎子傾家釀。不用平原老督郵。

次韻董彥孚獨臥逸堂之句

遠舍擅轡五月涼。歲寒高節亦難忘。期君鴻鵠應高舉。顧我蚍蜉豈自量。索價舊曾睨少室。荷鋤猶可繼柴桑。虛堂若許連牀臥。待看風吹細細香。

送黃柑與彥孚二首

殘臘才經一番霜。青青三寸作金黃。故園兄弟懷思我。特地分甘到草堂。

二

手折奇苞遺細君。更思持送逸堂人。甘寒定可錦繡口。看吐新詩泣鬼神。

過金山下作

揚子江中風浪生。小舟如葉任欹傾。槳搖齊指金山寺。霧暗初疑鐵甕城。絕頂迴分雙塔秀。層樓危立一僧清。它年來訪結庵地。吾與此江春水盟。

獨登有美堂

龜趺雙峙日星懸。讀罷憑闌心浩然。繚繞峯巒浮野色。參差樓閣起晴煙。湖光淨照山閒寺。江浪遙連海外天。安得翰林風月手。一時摩寫入詩篇。

雨中漫成四首

東風渾作勒花寒。寂寞林塘不受看。玉版鶴翎俱未識。梨梢空有淚闌干。

二

向老逢春懶問花。惡風吹雨故斜斜。一城桃李應飄盡。不到城南韋杜家。

三

一樹山礬宮樣黃。曉風微送雨中香。鼻端空寂誰知計。莫怪雄蜂取次狂。

四

纔見花飛掃不開。只今青子落莓苔。當時一笑冰雪面。曾動揚州詩興來。

送王山人

秋風蕭瑟賦歸歟。此去懸知食有魚。我亦羨君無奪糴。長沙終負過秦書。

謝幼槃文集卷第八

古賦論辯序記

懷故園賦

余故園之幽寂兮。拓荒榛而經始。面銅山之窳率兮。挹蕭晨之爽氣。擢天矯之蒼松兮。參虬龍之游戲。峙便娟之修竹兮。儼萬夫而環侍。築屋其閒兮。將以隱居而求志。盤旋不出兮。殆不知老之將至。夫何漂泊異縣兮。莽流萍之無蒂。山岑岑兮植壁。泉涓涓兮鳴佩。玩山水之清佳。亦足以樂飢而忘味。雖信美非吾土兮。昔之人所以登樓而橫涕。嗟三畝之寬閑兮。豈一錫之莫置。畦西滋乎秋菊兮。牆東繁乎春薺。晚食可以當肉兮。徐行可以當騎。冬裘夏葛。苟不完兮。寧紉荷而製芰。效鹿門之俱隱兮。逝優游而卒歲。辟纒猶可以易粟兮。吾豈從播閒之祭。繫古人之不食兮。獨貿貿然而蒙袂。事有感於予心兮。聊抽毫以寫志。

竹夫人賦

淇園之下。渭水之濱。有物森然。其色青青。刻畫以檀欒嬋娟之狀。俎豆以碧鮮玉潤之名。有匠若睨而歎曰。是物也。非松非桂。非楸非梓。孤潔似介。一何高士。溫潤似德。一何君子。是必良材者也。於是伐以斯棘之斧。運以斷泥之斤。製而爲器。強名曰夫人。竹友居士得之而喜曰。夫藻局璇室。朱宮玉闕。延羅幌之清。

風掃象牀之秋月。神女詫其雲雨。姑射逞其冰雪。有談夫人之高致。誦夫人之貞節。雖欲奉弊帚以享金。無乃獻璞玉而遭刖。則吾方遊息於瀛洲方丈之上。結廬於銅陵碧澗之下。以蛾眉曼綠爲伐性。以錦衾角枕爲階禍。或偃息於風櫺。或裴回於涼榭。炎曦鑠石之晨。璧月澄空之夜。與夫人其同夢。感莊周之物化。俄而商氣聿興。涼颿四起。葉翻翻而墮地。蟲啾啾其入耳。挂蒲葵於牆壁。委纖絺於篋笥。童子而請曰。今茲秋矣。歲其將換。御冬須狐白之溫。曝背幸朝陽之暖。唯斯之無所取材。願以給廚人之爨。居士曰。噫。子獨不聞夫伐著而哭亡簪者耶。子亦不見夫采葑而遺下體者耶。物或故則不忘。材有用則不廢。豈奢顧乎姬姜。乃棄捐乎憔悴。自古亦莫不然。吾又何增乎歔歔。雖然。吾方念此。欲以憩膝而休臂。童子出。居士乃據竹而歌曰。鵲姑南北兮。雨蕭蕭。匡牀之上兮。吾與汝其逍遙。

過隋論

隋高祖藉椒房之親。假黃鉞之制。秉國政以輔少主。知周祚之將亡。有革命拯民之意。舜禹禪讓之心。當是之時。中外側目。權貴忌之。於是詔五王劍履上殿。以慰安其心。親造趙王之第。陰欲觀其行事。而陽示不疑。手持太阿之柄。雖陰謀竊發。曾莫摧其鋒矣。高祖既有天下。明政刑。修守戰之具。欲以混一區宇。西斬吐谷渾。北破突厥。韎韐重譯而納貢。高麗稽顙而入朝。命爪牙之將。驅熊虎之師。旌旛樓船。千里相望。大軍南渡。日陰未徙。而亡陳。天下已定。銷兵偃武。有臨朝顧治之心。躬覽萬機。日昃不暇。衣服器用。崇尚朴素。遣使者以問疾苦。引乘輿以避老幼。罷魚龍之戲。痛雅頌之聲。不作。則當時之士。有牛弘。許善心。姚

察虞世基之屬承其詔欲舉先王之墜典修明五禮則蘇威薛道衡王邵之徒當其任如使高祖得行其志則堂堂平隋不可與周陳同年而語矣惜乎高祖有爲天下之志而無爲天下之量操持大器恐天下之並起而軋己譬如閭巷窶民一旦有十金之藏意其有擔囊而趨者惴惴恐惕夜不能寐彼獨不知富家父亦自有體耶當此時藏緯候圖識造兵器者有禁客舍無公驗者坐及守令朝廷之上言未卒口而鉄鑕隨之廢太子勇立煬帝其危亡之兆已萌而高祖不悟也此其過在於無爲天下之量所以無爲天下之量者何也忠厚不崇刻薄而善疑也古之帝王刻薄而善疑莫如秦始皇其疑之愈深隄防之愈密而患輒隨之而生始皇收天下之兵聚之咸陽銷鋒鏑鑄爲金人十二蓋疑天下之人有持兵而反者然不知陳涉之起斬木爲兵揭竿爲旗奮臂一呼而金城不守也秦法羣臣侍殿上不得持尺寸之兵諸郎中執兵陳殿下非有詔召不得上蓋疑左右之人有包藏禍心者然不知荊軻之匕首乃發於燕督亢之地圖而無目之高漸離猶能舉筑以扑也事有曠千百年而合若符契者秦隋是已秦世皇刻薄而善疑傳之二世而亡隋高祖刻薄而善疑傳之煬帝而亡借使此兩君崇忠厚之德修寬裕之政以懷來天下後雖有淫荒之子孫宗廟尙可以延漢高帝不過泗上亭長唐高祖亦北面而稱臣耳其能取天下而有之耶故曰亡秦隋者非漢與唐也秦隋自亡也詩云殷監不遠在夏后之世是以聖人爲天下稽之往哲考之前事察治亂之由循寬猛之宜仁風德澤搖蕩浸灌人心歸之如父母措天下於磐石之安誰得而侮之耶

孝辯

或問孝曰。頃步不忘親。終食之間不忘親。孝子哉。曰。有食於稠人之坐。饋之羊。舍而弗食。言於衆曰。羊甚美。吾有念母之心焉。請以遺之。或謂是詐而已矣。是取名而已矣。子以爲何如。曰。是孝也。食之甘者。念其親。此人之情也。非孝之難也。穎考叔食而舍肉。鄭莊公母子如初。桑下餓人食而餘其半。趙盾遺之簞食。與肉。穎考叔非誠欲以遺母。而桑下餓人又未必其誠孝也。莊公因而有感。宣子不以爲疑。此人之情故也。或謂是詐而已矣。是取名而已矣。亦豈無人之情哉。斯人之說勝。吾不忍孝子之忘親也。今人知愛其子。必朝暮求其所好以悅之。豈愛親不若其子歟。噫。人皆知易其愛子之心。以愛其親。天下豈有不孝子刑哉。或人瞿然曰。有是哉。子之言是也。然則孝子之心。其亦可知也已。

送邵尉序

大凡有心於得而得者。其心勞。而所得也不完。唯無心於得而得。然後其心泰然。而所得者亦多。莊周列禦寇之徒。其言荒怪渺莽。而其要一歸于無心。故嘗謂海濱之人。機心一萌。則鷗鳥不下。而索珠赤水之北者。唯象罔能得之。金谿尉邵公。弱冠登進士第。仕宦偃蹇不達。垂二十年。猶尉富邑。平居無事。種學自娛。未嘗飾一詞以求知於要人之門。其於窮達得失之際。泊如也。爲尉之明年。盜嘯於境。探丸爲彈者衆。吏胥以聞。公徐應曰。除盜吾職也。其可以稽吾行耶。於是衣戎服。帕首袴。鞞鞭馬而出。不淹日。掩羣盜梟之。四境肅清。枹鼓不鳴。部使者錄其功上之朝。未幾授宣義郎。而使者又論其餘功。其賞猶未已也。邑之

有識之士相與言曰。往時尉吾邑。有心於賞者。往往交通舞文吏。以陷人於死。賞未及行。而惕惕然意其臥不安席也。今公無心於賞。而刑者自不冤。雖一日九遷。其官可無憾。公丹陽人也。家世以儒術顯。其爲人號稱寬厚長者。而貌偉然。古所謂燕額虎頭飛而食肉者。異時勒銘燕然。立功樓閣。鞬弓橐矢。雍容廊廟之上。其可量也哉。邑之士望公者如是。將因辭以達意。故於其行也。屬予爲序。以贈其行云。

狄守祠堂記

撫於江西爲富州。其田多上腴。有陂池川澤之利。民飽稻魚。樂業而易治。歲比不登。道殣者衆。破貲鬻田宅者。十室而七八。持妻子取庸直者。十室而三四。其輕俠少年。無不椎埋掘冢。白晝劫人於市。寢以不治聞。太守狄公下車之初。行其獄。桁楊者相推。案租賦。逋負山積。登進其民。皆疲瘵餓羸之餘。公喟然歎曰。民弊如此。其可苛急治耶。於是繫獄者薄其刑。負租賦者緩其期。其爲政寬而不弛。其出教條簡而易遵。一年而服。二年而變。三年而有成。州父老相與謀曰。完我身於囹圄鞭笞之中。佚我黎老於凋瘵之後。蓋公之德也。公歲滿且代去。盍立生祠以慰我民之思乎。皆應曰。然。它日又相與謀曰。祠易爲也。將請於公。立於州之使坐。則出入有禁。不得朝夕拜祠下。欲使其出入且奉嚴潔。宜莫如僧舍。州之僧舍數十。其屋宇靜深。莫如景德禪院。院之主僧又有才智。能辦其事。於是富者出財。技巧者出力。不日而告成。旣落之。咸來請於余。願有記。夫沒而有犧尊太牢。不如生而卮酒一肉也。沒而廟食百世。不如生而一朝奉嘗也。公之旌麾未去。民已圖其像而祠之。可以爲公榮。然此邦之人。思公亡窮。公去而羽儀於天朝。豈能忘情。

於此邦哉。幸公之異日持節再來。其德意之厚。政事之美。雖不敏尙能爲邦人頌之。公江陵人。唐宰相梁公之苗裔。家以儒術吏事顯。公能世其家者也。

適正堂記

昔之儒者。正君臣。父子。夫婦。長幼之倫。談仁義。禮樂。教化。刑政之具。自以爲至矣。學老子者。從而非之。以爲博而寡要。勞而無功。吾師之所傳不如是。要以無爲清淨爲務。亦自以爲至矣。學釋氏者。又從而非之。以爲久生近乎貪。養形近乎愚。吾師之所傳不如是。以寂滅爲宗。以無生爲樂。夫三者之相非。豈有既乎。然今之世。學釋老者。競非吾儒。其言汪洋浩渺。足以駭世俗。而儒者反取釋老之言。以明六藝之學。嗚呼。安得孟軻。揚雄。韓愈之徒出而排之。使吾聖人之道廓如也。吾友吳迪吉作樓於其居第之西。其下闢以爲堂。圖孔子。荀卿。揚雄之像於其間。又取韓愈原道之書寫於其壁。而名其堂曰適正。蓋取揚雄法言所謂適堯舜文王爲正道者也。迪吉屬予爲記。且使道其名堂之意。余謂迪吉子坐於中堂。瞻數子之容。而思其學。觀原道之書。而詳其義。則堯舜文王之道參乎其前矣。雖然。理固有待物而明者。嘗試登君之樓。以望長江之流。浩浩乎其必歸於海矣。乘舟而往。順流而不止。雖欲至海可也。航斷港絕潢者能若乎。迪吉曰。我知之矣。泛長江而歸乎海。是適聖人之正道者也。航斷港絕潢。是適諸子百家之他道者也。我知之矣。子其爲我書之。余曰。唯唯。

謝幼槃文集卷第九

題跋贊頌

讀仁宗政要

仁宗皇帝在位四十二年。深仁厚澤。海涵天覆。百姓鼓舞而不知。及夫鼎成龍駕。望白雲而號者。徧乎天下。父老至今能言之。往往咨嗟歎息。至有泣下者。蓋感人之深。人亦不自知其然也。孔子曰。大哉堯之爲君也。惟天爲大。惟堯則之。蕩蕩乎民無能名焉。書載堯之事備矣。至所謂大而民無能名者。書亦不能名也。余讀仁宗政要。求其所以感人之深。殆不見其迹。然從其所任用者觀之。庶幾可概見矣。盛哉慶歷之中。二三大臣同在廟堂。洋洋乎忠厚之風。藉使生逢其時。雖掃舍人之門。所欣慕焉。

書元稹遺事

予觀司馬遷遭李陵之禍。蓋出於無辜。竊怪在廷之臣。無有爭之者。而遷亦自歎恨。以爲交遊莫救。左右親近不爲一言。故作史記之書。大抵欲寓其憂憤之懷。爲晏平仲列傳。書其解左驂以贖越石父之罪。而卒稱之曰。假令晏子而在。雖爲之執鞭。所欣慕焉。予讀其書至此。三復其辭。而悲之。使漢廷臣有一晏平仲。豈忍坐視遷之無辜。以受刑而不一引手而救之耶。及觀韓愈傳。見王廷奏之圍牛元翼也。朝廷命愈

使而人莫不危之。是時廷奏擁強兵，恣睢跋扈。天子遣一介之臣，投餌虎狼之口。若萬一無生還理，得不得謂朝廷失一賢士耶？得不詒天下後世笑耶？然當時公卿大臣無爲愈言者。獨元稹言韓愈可惜，穆宗亦稍稍悔之。嗚呼！誰謂元稹而能如是哉？世之君子少，而小人常多。小人不特偷安於朝，又沮毀以害君子。與君子一有受其害，從而擠之者，皆是也。而稹乃能知愈之賢，不忍視其身之危，將無援以死，且重爲朝廷惜之。是亦可謂難能也已。觀稹之於愈如此，使其在漢廷，必能出一言以救司馬遷之禍，使後世復有司馬遷，亦必特書其事。且願爲之執鞭焉。彼作史者，乃不載之本傳，而特見於愈事之末，是可歎也。稹與白居易同時，俱以詩名天下，然多纖豔無實之語，其不足論明矣。觀其立朝大槩，交結魏弘簡，沮抑裴度之言，以浮躁險薄稱於時。至于知賢救難，奮激敢言，凜凜有古直臣之風。夫以元稹而猶能如是，又況不爲元稹者乎？

書賈誼傳後

賈誼說文帝以諸侯強大，天下之勢如病瘡，失今不治，必爲痼疾。文帝入絳灌、東陽、馮敬之言，未盡施行，而誼亦不幸死矣。晁錯得幸景帝，乃請諸侯之罪過，削其支郡。於是七國連兵西鄉，以誅錯爲名。吳王謀反，已兆於高帝之言，豈爲錯發哉？袁盎一說，錯遂滅其宗族。悲夫！使誼不死，景帝之時，絳灌舊臣無在者，誼必得志，得志必盡行其策，則晁錯之禍，誼其當之耶？誼之不幸而死，乃誼之所以爲幸也。禍福倚伏無形，其不易知如此。班固稱誼天年早終，雖不至公卿，未爲不遇也。固亦有見於斯耶？

書鄭當時傳後

司馬遷稱鄭當時每朝候上。閒說未嘗不言天下長者。其推轂士及官屬承史。誠有味其言之也。當此時諸公翕然稱鄭莊。而後世言推賢好善者。亦必曰鄭莊云。然觀武帝時。莊所進言。見任用者。東郭咸陽孔僅。其人也。武帝內興宮闕。外事邊陲。言利之臣析秋毫。而天下蕭然不聊生。咸陽僅擢於鬻鹽大冶。其言利殆與桑宏羊等。此其爲害於天下豈少哉。謂莊好言長者。而長者固若是耶。抑所言多長者。而武帝不用也。方魏其武安東朝廷辯灌夫。汲黯與莊同是魏其。而莊獨不能堅其說。武帝詆以爲轅下駒。司馬遷亦言其趨和承意。不敢甚引當否。蓋莊天性樂善。至上不能用。則亦順旨而從諛。嗚呼。誰謂鄭莊推轂士爲足尙耶。觀其所進者二人。卒爲天下蠹。然則衛將軍之於士大夫無稱焉。賢於莊遠矣。

溪堂先生畫像贊并引

有好事者。畫溪堂先生深衣幅巾。蔭喬木。坐磐石。目飛鴻。脫屣石上。濯足於懸瀑之下。或者見而疑之。竹友居士從而贊之曰。

以君爲在山林耶。炯然之容如珠玉。儼然之衣有表襮。以君爲在市朝耶。泠然之泉如濯足。翩然之鴻與寓目。蓋用之而行。則服鑿輅。被羈絡。而爲奉輿之駟。舍之而藏。則脫斤鋸。老谿壑。而爲蔽牛之木。疑君者滔滔皆是。而知君者唯我獨也。

雙柏頌并引

子謝子有讀書之館。有雙柏峙于庭下。枝葉蒼然。予顧而譽之。且曰。世之君子。遭時斥逐。守道不變。蓋有似乎茲柏。昔屈原作橘頌。以自況。橘固美材。然冬夏青青。唯松柏獨則橘斯爲下矣。頌雙柏以寄吾意云。

后皇植物。柏嘉樹兮。亭亭雙峙。季孟序兮。繁枝脩幹。芑庭廡兮。寧固根本。傲寒暑兮。四時更運。不改度兮。葱蒨茂蔚。紛其可譽兮。蒲柳弱質。秋殞女兮。挺立不衰。獨何懼兮。維聖有作。誕胥宇兮。翳爾異材。中梁柱兮。不震不傾。亘千古兮。明告庶士。莫予侮兮。

竹友軒銘并序

謝子開軒於書館。鋤荒剔穢。植竹數十本。游居寢臥其下。竹貫四時。而不改柯易葉。君子似之。故命其名曰竹友。而爲之銘。

層冰義義。萬木被雪。我觀茲竹。勁氣貞節。桃李其華。煜煜中林。我觀茲竹。淨綠寒陰。惟竹有材。可管可籥。斤斧勿侵。以保天年。我挂我冠。與竹燕休。養成嘉實。鳴鳳來游。

何之忱抱甕園銘

彼愚而夸。飛宇綺疏。雕鏤朱丹。遺巧則亡。此哲而窮。蓬戶桑樞。是豈固然。今古一途。我觀何子。孝友愉愉。不爲於陵。離母以居。總角寄巢。迄於霜鬢。其勤其艱。以有屋廬。環堵蕭然。風雨僅除。爰開小園。荆棘自鋤。前有瓜田。後有芋區。早韭晚菘。可嚮可茹。斑衣兒啼。將奉板輿。萊婦華顛。以翼以扶。殺雞無羸。客至飯蔬。

畦丁晨告。雨物不濡。躡躡行汲。色賴力劬。胸中純白。豈曰朱愚。海客有心。鷗鳥凌虛。機舂原籟。智則有餘。是皆機械。有道所誅。君寧搢搢用力。抑將謂枯槁之不如乎。

陳無惑晏室銘

子陳子晏。坐靜室。牀敷居中。文史在前。蠻觸干戈。日塵於外。而吾心澄寂。若止水之淵。朝於是。夕於是。出於物構。而須臾之間。復此乎盤旋。其視鼻端。寂然如閉息之龜。其遺形骸。杌然如委蛻之蟬。能如是坐者。雖維摩詰見之。其敢曰不然。若夫身居一室。而心遊四海。是猶圈虎豹。而檻猿狙也。其誰以爲晏耶。

某局銘

世傳神仙。奔某山阿。樵者觀旁。斧爛其柯。謂堯教子。此理則那。不有博奕。猶賢乎已。爲之不止。牧豬奴戲。不以自警。曷告子弟。

尺銘

童子適市。老僧不欺。較短量長。惟爾其無私。

謝幼槃文集卷第十

墓志祭文

董彥孚墓誌銘

君字彥孚諱革姓董氏家撫之金谿贈承事諱某隱居田里孜孜樂善不倦於君爲曾祖王父隱君生承議郎通守虔州諱某清修刻苦居官守正不撓工詩博學至老未嘗一日廢書虔州生信州玉山主簿諱某越州司戶參軍諱某同年登進士第以經術文章擅場一時稱江西兩董越州早亡玉山性剛狷不肯俯首事大吏以是宦不達玉出生君三歲姆抱觀壁閒書一日弄筆寫十餘字乃壁閒所嘗見者玉山驚異之四五歲誦書如建瓴水賦五字詩有文采可觀稍長下筆奮迅如風霆聲觀者辟易虔州拊其背曰異時以文學大吾後必此兒也後數從進士試其爲文汗漫喜出怪奇語卒不合有司繩尺益放情爲歌詩其悲歡譏罵一於歌詩見之年四十一以卒時政和二年六月甲子也以其年十一月甲子葬於興源山之側王母壽昌君曾氏春秋高君左右事之常得其歡欣於是壽昌君哭之不成聲曰天乎吾老而見嫡孫之亡也室王氏二男回孺皆童稚四女長許嫁幼在襁褓二季需曇才士也集君歌詩五百篇藏於家撫其孤且教之君其必有後乎余娶君之姑知君最詳爲銘曰

挾才以爲鐵。援經以爲弧。惜榮名之不立。撫轡服而號呼。季也懷之。羽翼其雛。尙克奮飛。釋憤幽墟。

吳伯俞墓誌銘

余昔讀書龍泉之陽。見其地肥衍。有稻粱魚果蔬之饒。意其必有素封之民居於其間。面山而帶溪。氣象清曠。又意其必有俊秀之士出焉。旣而識吳君伯俞。君語余曰。吳氏自高安徙臨川。卜築於龍泉溪上。不知其幾年矣。吾祖吾父皆力穡爲善不脛。逮吾治生而貲益奇贏。吾是以構屋買書。延四方之才士。使吾兒從之游。已而見其子果皆好學而文也。君以政和四年二月癸卯卒。壽六十有八。以其年十月辛酉葬于穎秀鄉之仙游原。其子克明錄其實。衰經走百里。乞銘於余。辭之不可。遂序而銘之。君諱仕舜。伯俞其字也。曾祖諱道玢。祖諱文侃。考諱仁遂。君喜觀書。尤長於陰陽五行之說。善飲酒縱謔。客至無不罄歡。歲饑。低穀價以惠貧民。疾病不能調醫者。爲發藥治之。賴而活者頗衆。有負子錢數百萬者。焚其券弗問。有娶其兄之子。貧不能自給者。分田以養之。其恤於鄉里。厚於宗黨類如此。三男子。曰克開。曰克明。曰克從。孟前君七年卒。仲初授衡州耒陽尉。季嘗貢于辟雍。先室饒氏。繼室周氏。一女子。嫁進士饒擴。早卒。孫男四人。曰邵。曰邠。曰郁。曰郊。孫女三人。孟旣嫁而卒。餘未笄。銘曰。富好行其德。知其志之無驕也。德必饗其樂。知其家之有後也。嗚呼。百歲之後。近其墓者勿樵也。

朱夫人墓誌銘

夫人朱氏。撫州金谿人。贈宣德郎諱彥國之孫。處士諱獻可之女。同邑人陳筴君謨之妻。爲職方員外郎。

出守濠州諱獻明者夫人之叔父也夫人以大觀四年七月戊申卒享年三十有七以政和元年十二月丙午葬于歸政鄉交龍原男三人曰德厚曰處厚曰躬厚女四人長嫁進士周均餘皆幼夫人喪父母蚤王母崇德君憐之不許嫁凡兒濠州承崇德之命擇所宜適以歸君謨夫人爲兒時柔順稱於宗族及爲婦爲妻益以孝敬聞其姑曰吾爲陳氏繼室養時尙少左右就養俾吾安其室之惟子子之孝亦予婦之力也君謨曰吾治家有法爲士無過行吾妻每有助焉夫人之卒也其姑哭之哀甚君謨日拊棺哭不絕聲出與賓客語泫然不知涕之交頤也或謂君謨賦悼亡之詩足以寫其悲懷不然出遺服櫛佩圖佛以授浮屠亦足以塞悲二者君謨皆不暇爲乃日夜悲傷憂慙至於病猶未已雖伉儷之重君謨所難忘亦夫人之賢實使之君謨病且愈叩余門泣涕言曰吾妻葬得日願有銘余旣夙聞夫人有賢行於是撰次其事又嘉君謨能篤於夫婦之恩也乃序其情作哀詞以弔之使鑲諸石內之壙中以當銘其詞曰
朝之容蹢蹢兮于豆于觴夕之容翼翼兮我襟我裳一日棄余而往兮莽不知其何鄉姑當饋而賈涕兮兒啾啾而在傍我夢平生兮婉若覲其清揚旣覺而非兮徒有泪其浪浪身如朝露兮何者爲強餘生纔幾兮憂又克傷凋蘭瘞玉兮何日而忘

朱夫人墓誌銘

金谿陳大聲將葬其妣以其父命來謁銘且曰大聲從君伯氏溪堂先生游又辱知於君溪堂工文詞銘貞士烈女節行不誣吾母葬得日而先生適謝世微君誰宜銘者不得銘其何以掩諸幽余不得辭乃諏

其家世行實序而銘之。夫人朱氏撫州金谿人。朱氏大家有宦於朝爲顯人。而仕於州縣者相望也。夫人祖諱宿。考諱宗良。皆隱德不仕。夫人年十八歸爲陳師堯聖徒之配。於是姑老矣。夫人於倫次爲冢婦。事姑孝謹。至于疾痛疴養無不察。而家事無大細皆親之。其從夫以敬。其訓子以嚴。其友娣婦以和。其御童僕以恩。其言其動無纖毫不本於誠者。故陳宗無疏戚莫不敬愛之。姑捐館舍。旣終喪。夫人以家事委諸婦。而聖徒亦放曠樂酒。不躬事生業。歲時諸女來覲。孫子侍側。希譁鞠臚。舉觴交獻。逮其暇豫。含飴弄孫。蓋將以佚樂壽考終焉。而夫人不幸止此。其可哀也夫。卒以政和二年二月甲子。享年五十二。以其年十月己酉葬于歸政鄉之柳原。男三人。大聲。大球。大信。女三人。嫁彭通。一黃馭許獻可。子與壻皆從進士舉。孫男女九人。皆幼。銘曰。

婦德幽幽。孰傳其譽。子行表表。乃知其母。壽不稱德。子孫其昌。宰木百圍。無或壞傷。

祭無逸兄文

嗚呼。羣從兄弟。孰如兄賢。豈特羣從。此邦則然。猗與幾希。豈惟此邦。世之偉人。其心則降。兄與信民。猶壁一雙。庚寅之秋。汪子云亡。自楚計聞。衆爲蠱傷。豈知此來。兄又窵空。僅閱三稔。乃瘞連壁。凡今知聞。孰不霑臆。某也晚生。少兄七歲。讀書相從。兄冠我稱。凡視我爲。不曰兒戲。教之誨之。以俟其成。及我旣冠。待以友朋。歡然之恩。不唯弟兄。我壯益窮。祿欠升斗。客于下邑。計以餬口。兄書日來。問我安否。去年從兄。走於京師。風雪脩途。閒以凍飢。逮其旋返。病不能支。我侍兄行。逆旅謁醫。操藥饋漿。鮮克以時。從者息肩。哭聲

在韓嗚呼我不忍思。尙忍言之兄之詩文爲世所珍。廣微之書以遺後人。欲銘其藏。必得名世。我未往求。書石以識。載我以尊。酌以祖行。肺肝塌然。有淚如瀉。

祭董彥孚文

嗚呼。彥孚學足以入官議事。而無祿以代其畊。智足以發姦摘伏。而無地以施其巧。顧世之暗聾。或施施而得志。而君之智術。乃皇皇於一飽。衆雖欲殺而莫憐。子亦從噴而須臾。頃駕言而寓居。嗟識面之不早。我每倡而君和。子或可而予否。初疑鑿柄之難合。卒若酸醎之適口。共娛嬉於文字。亦殷勤於杯酒。方子之疾。我獨執其手。方子之斂。我獨撫其柩。始也哭子以詩。自謂足以寫哀。旣而銘子之藏。人或意其不朽。適涓辰而啓殯。復撫事而垂淚。夜漫漫而莫旦。魂杳杳而何之。酌一觴而告決。庶髣髴其來思。

潘邠老哀詞

予離羣而處獨兮。望古人而求友。君被褐而懷才兮。臥柯邱之林藪。賦幽懷於秋夜兮。雖愛君而不見。託筆墨以寫心兮。蓋定交其已久。歲乙酉之將盡兮。始識君于大梁。面蒼蒼而髮星星兮。何茲時之不偶。君曰無傷兮。繫吾道則然。相從于漏屋之下兮。日賦詩而飲酒。越仲春之未望兮。我乘舟而東去。君踟躇而不忍別兮。步河隄而攜手。念會合之難常兮。嗟形影之乖離。旣黯然而分道兮。嘗瞻焉而回首。謂別君其幾何時兮。曾書問之不通。驚凶計之奄至兮。爲投箸而噎嘔。予固知自古皆有死兮。誰能免夫。牖下夫何奔走於道路兮。竟死于奴隸之手。矧比年之凋喪兮。巍然皆國之楨。雖學而未仕兮。天又魃而莫之壽。意

君死而無憾兮。從諸公於九泉。奈生者之惻愴兮。謂天意之莫究。維君之文兮。予謂不朽。于今之世兮。祇以覆瓿。不顯於今兮。固傳于後。嗚呼。君身槁壤兮。君名星斗。

右謝幼槃文集十卷。凡古詩四卷。律詩三卷。雜文三卷。自宋以來。流傳絕少。明謝肇淛從內府鈔出。前有苗昌言序。呂本中原跋。及肇淛與其子景以下六跋。與昭文張氏愛日精廬藏書志所稱本同。欽定四庫全書提要。從宋史藝文志。陳振孫書錄解題。題爲竹友集十卷。亦卽此本。惟簡明目錄著詩七卷。文四卷。爲十一卷。疑偶誤耳。書無刊本。傳寫多訛。嘉善曹氏宋詩存選錄一卷。頗有異同。乃不得其意。憑臆改竄。不足據也。此本由雪枝從父守山閣藏書借抄。其巨謬者。第三卷末。據目錄有竹友軒。賈時軒。讀莊子內篇三題相次。卷中賈時軒詩全首。誤屬於讀莊子內篇詩中。又割竹友軒前八句。合於讀莊子內篇末四句。題爲賈時軒。而次於讀莊子內篇之後。錯亂顛倒。致不可讀。今爲更正。其他卷中篇題次序。亦有與目次不合者。抄本相沿。姑從其舊。原有空字。無可校補者。仍缺之。不敢妄增。又據苗昌言原序。似與無逸同編。今溪堂集反無兩序。殆傳寫失之歟。咸豐建元歲次辛亥仲秋月朔。錢培名識。

原跋

謝康樂詩規摹宏遠爲一時之冠。而元暉詩清新獨出。又自有過人者。後之善言者於二公蓋未敢有所優劣也。本中竊以爲無逸詩似康樂。幼槃詩似元暉。此平等之論也。紹興三年秋。自嶺外北還。過臨川。去幼槃之沒十八年矣。始盡得幼槃書於其子長訥所。伏讀累日。益知前語之不謬。雖然。幼槃與其兄無逸。修身厲行。在崇寧大觀間。不爲世俗毫髮汙染。固後進之師也。其文字之好。蓋餘事爾。後之學者。尊其行。并學其文。可也。學其文。不究其行。則非二子立言之本志。九月二十日。呂本中書。

幼槃詩文不傳於世。此本從內府借出。時方沍寒。京師傭書甚貴。需銓旅邸。資用不贍。乃自爲鈔寫。每清霜呵凍。十指如槌。幾二十日。始克竣帙。藏之于家。亦足詫一段奇事也。萬歷己酉十二月十四日辛酉。晉安謝肇淪手題。

先大人書法。步趨右軍。故平日行似聖教草。肖十七帖。獨真書最少。卽不肖。杲亦罕見。此二冊乃先君己酉歲服闋。候補都門。手抄謝幼槃先生集。字畫端楷。無一筆潦草。杲偶得於亡侄殘篋敗篋中。手捧跪誦。悲喜交集。嗚呼。物經七十六年。茲以無意中復歸於杲。豈非在天之靈有默相耶。因重加修整。謹識時日。以傳子孫。使後來知余得時情狀。能永永珍惜。未必非孝思之一端。上元甲子嘉平月朔。不肖男杲拜手敬書。

甲子臘月一日。青門翁晨過手捧二大冊。踵趾重繭若不得前。遙呼曰。我昨自猶子宅拾其遺籍。得先方伯手錄宋謝幼槃全集。言未已。飲聲欲噎。蓋喜極而轉恐也。余因得受讀。省觀細楷精繕。首尾無一畫錯。伍自記云。需銓旅邸。借內府祕本。深冬沍寒。窮二十日錄成。合三萬餘字。時爲萬歷己酉。赴補冬官之日也。迄今七十有六年。手澤如新。後人撫栝。而輿感能禁青門之捧而欲泣耶。頃讀福唐相公敘謝公北河紀。亦稱公入都時。借內閣祕籍抄填校勘。可知公方銳進之時。汲汲芸窗素業。無一毫熱中騰仕之念。俯仰今古。是何等品誼耶。謝幼槃名在崇寧大觀閒。以嶠然不淄見稱。呂舍人本中章章有述。公目中豈真以其詩文爲模楷。顧自有欽崇之道耳。惟青門廣其意。未必不當謝家之寶訓哉。東山後學黃晉良頓首敬跋。

佶生十餘歲。得讀先生五雜俎一書。其羅籠名物。錯綜天地。真曠若發矇。晚復盡窺先生諸刻。浩如森如。未易究其涯涘也。曩與先生同時者。經濟推崇相董先生。淵博推能始曹先生。先生與之韻頗而會集長。蓋三百年來。吾鄉先進中一振奇君子也。世運而往。典型凋謝。何幸得覩遺墨于烏衣舊巷中。王氏通天帖不得專美于前耳。甲子臘杪。後學林佶敬識。

前于友人處見陳元愷先生莊子一卷。荀子一卷。董見龍先生程墨一冊。並手書端楷。精謹絕倫。并此可爲三絕。因思前輩問學淵源。勤篤不倦如此。此東坡所以致慨於昔之君子見書之難。而今之學者有書不讀爲可惜也。書以志愧。佶再題。

予幼不善書。讀唐書至心正筆正之對。未嘗不歎古人立言之旨。與用心之處。有卓越羣流者。歲戊辰。再入閩。閱晉安方伯謝先生手錄謝幼槃集。青門輯而藏之。以爲世寶。竊歎今人何必不如古人。古人又何出今人下也。褚大夫書名甲李唐。一日帖成。而須髮白。視先生之呵凍何如也。庾氏爲晉名流。而子弟輩以家雞棄之。視青門之惴惴然以圖世守者。又何如也。噫。書小技。何足重先生。予還述先儒之稱幼槃者。曰尊其行。學其文可也。學其文不究其行。非二子立言之本旨。恐亦非先生手錄之意也。云爾。康熙戊辰陽月。浙西後學臧眉錫謹跋。

康熙壬辰陽月高平邢村范氏手鈔。

